

鄉

園

憶

舊

錄

鄉園憶舊錄卷二

濟南王培菴雪嶠輯

馮舍人廷槐字大木德州人幼有奇童之稱讀書一覽不忘在都時有得諸葛銅鼓者與秋谷各賦長篇名動一時舍人師漁洋友秋谷詩格超峻時以餘力爲奇情險語康熙丁卯典試湖廣登黃鶴樓俯江漢眺內方大別諸山望瀟湘洞庭慨然遠想有詩百篇所謂晴川集也秋谷合其雪林曹村等集爲一序而刻之友人馬子琴見其原稿經漁洋刊削而粗服亂頭利鈍互見蓋豪情邁往昂藏奇偉之概不屑規規於字句閒耳最愛其

元日試筆云舉手欲挽西飛日滿引長繩繫不得回首
欲拂鬢角雪蘆花滿鏡空愁絕既無金鼎燒丹鉛坐愧
青山不老仙又無博帶與峨冠勲業崢嶸羅簡編兀兀
騰騰五十年一杯歲酒忽入手歎息今爲扶犁叟提筆
一埽千尺壁太陰昏黑鬼神泣伸紙立成萬言書懸流
千斛灑明珠舉頭四顧覓吾徒世上大笑詒癡符左手
尙據天下圖右手引決毋乃愚不如聊復守須臾行年
五十古云艾歎息今無前輩在一年十有三月閑無計
破閑但醉眠一月四十五日醉事大如山總贖贖昔時
大罵程不識平生不作一錢直而今恥付子公書投老

甘爲山澤癯三杯五字長相於我生五十何足歎百歲
堂堂纔過半

宋荔裳先生晚字玉叔萊陽人族中無賴子夜宿土地
廟夢神告以先生與逆賊于七通謀遂計之官繫獄二
年乃白爲蜀臬與漁洋先後入川後入覲卒於京未幾
四川亂妻子流離在川未久政聲卓然有蜀遊草其子
送之漁洋選入感舊集所刻安雅堂集亦未全身後多
散佚也在獄作聽鐘鳴詩聽鐘鳴所聽非一聲一聲纔
到枕雙淚忽縱橫白頭老烏作鬼語羣飛啞啞還相驚
明星落悲風哀關山蕩子行不返高樓思婦難爲懷何

況在羅網夜半聞殷雷無糜復無褐腸內爲崩摧聽鐘
鳴心獨苦獄吏抱鑰來不許吞聲哭

三臺逸民王冷岑我庸也隱居三臺山下褐衣不完有
酒輒醉好吟咏尤長于詞曲可被管絃有問姬偶然蛩
音秋嘯諸吟王考功季木深取之

董樵字一樵甲申後移居海濱采薪易米人莫知其住
處有紳士要于路欲與語棄薪而遁有詩三四十卷一
樵萊陽人雖不出而名重天下

姜文貞先生如須名垓萊陽人兄塚廷杖斃口含溺灌
之始甦又請代兄繫獄不允後流寓吳越悅金陵妓李

十娘色藝雙絕久不出戶友人方密之孫克咸皆擅拳
勇履樓閣如飛夜靜後兩君一躍登屋直至臥室排闥
而入如須驚起長跪乞勿傷十娘兩人擲刀大笑曰三
郎郎當三郎郎當如須行三故也呼酒命酌極歡而散
公官行人見解舍碑有阮大鍼名特疏請
除之別刻徐昭法詩擊奸碎穹碑指此

張杞園貞字起元安邱拔貢生舉博學鴻詞授翰林院
待詔博雅好古能鑑別書畫鼎彝之屬精金石篆刻遊
吳越與高士名僧往還購書千百卷居杞城故墟作杞
園二十二卷博引古書阮亭先生稱其體大思精得太
史公筆意愚山先生稱其原原本本可補正史之遺家

有田四千畝無憂饘粥南面百城日以著述爲事古文
集已板行論者欲與虞山堯峯閒置一席其後藏書之
樓火自中起書籍古玩盡付丙丁一端硯忽自窗閒奔
躍而出家人珍而藏之然已損矣裔孫有名堂者號鏡
川道光乙未進士宰四川岳池弟埜亦入翰林四弟微
堂嘗至其家一門長厚猶有先世之遺風焉其後人多
善篆刻亦傳家學

按張待詔樓
名寶墨有記

畢載績刺史戶部公長子名際有陳其年謂先生牧通
州惠政淪浹去官之日都人士女遮道啼泣作淄乘徵
泉史存吾草諸書崔不雕爲畫桃花燕子便面家銀臺

公見而愛之爲作詩又得陸放翁心太平硯形製八角
題識刻畫精絕漁洋有七古長篇咏之嘗卽席揮毫和
陳其年韻云燈下幽窗讀楚詞忽驚秋鶻縱絲絲竹爐
聲竊鸚哥語正是檀槽半咽時

趙秋谷手批唐詩鼓吹托名元遺山選識者知其僞秋
谷殆隨手批評然於人所熟贊如秋興八首等概不丹
黃亦無評語所賞別具隻眼略加品隲能使詩之精神
湧現其不愜意如曹唐輩亦不置可否惜皆七律無別
體無從覓其金針憶友人誦其評絕句一首南朝四百
八十寺盡在樓臺烟雨中評云丹青大手

人之選詩各從所好鄧孝威選漁洋詩擇其蕭寂淡遠
音在絃外者沈歸愚選其沉實高華近唐音者宋蒙泉
所選無體不收要以神韻爲主六家詩四家詩所選入
則以多爲勝四庫全書總目評漁洋前集漁洋續集云
其時精華方盛與天下作者馳逐競名生平刻意之作
見於二集者爲多或議其蜀道集爲僞杜欺人余觀本
朝詩人後來如顧晴旭馬墨麟王述菴皆自入蜀以後
變爲險峭警拔蓋山川境地使然豈皆有意摹杜何獨
議漁洋 純皇帝諭閣臣曰原任刑部尙書王士禎積
學工詩在本朝諸詩人中流派較正自當以 聖諭爲

定評矣

謝方山重輝大學士太傅清義公陞子廕中書舍人漁
洋評其詩去膚存骨去枝葉存老幹如長松怪石顛倒
絕壑冰雪之所凝沍飛瀑之所穿漏詎復知名園百卉
之爭妍競媚於春風駘蕩中耶所居村外多杏嘗作杏
花圖新城王石丈筆也名人多有題咏遂呼之爲杏村
有詩云成宏以後論風雅許李邊劉派最真可惜襲生
吟獨苦不逢健筆鬥清新

許謂殿卿李謂
滄溟劉謂天民

萬歷詞人十

輩餘邢楊之外各遺書粗才遁句崢嶸甚古調淳風似

弗如

楊謂夢山太宰
邢謂子愿太僕

低頭蠶尾思懷古放眼山薑喜鬥

新耳食紛紛問諸派不知身是濟南人念東句比樂天真子底才名李杜倫更有詞場唐夢賚時從逸處見嶙峋漁洋云足徵吾鄉文獻詩之有關掌故如是

秋谷海漚小譜大抵載天津諸姬讀其詩其人之精神丰采曲曲傳出里居時觀於友人案頭惜係鈔本匆匆未錄袁簡齋隨園詩話僅載七絕二首耳其書曰譜必詳敍其人如板橋雜記余所見亦僅有詩而無譜蓋摘錄非全書也談龍錄多指引後學語不盡詆排漁洋其論泛言河上風景不知誰爲主人誰爲過客但知數典而詩中無人雖警當時實爲後學度盡金針犯此病者

不少也附聲調譜一卷袁子才議其拘但心知其意而不泥其法則可違之卽失調矣

孔東塘尙任自稱云亭山人由國子博士厯官戶部員外郎博雅好古作漢銅尺記周尺考周尺辨漁洋稱其精核作桃花扇傳奇一時風行紅蘭主人以通部教其梨園在淮陽駐節三年或招之宴飲席閒輒演桃花扇俟其點正疏節有某伶善唱畫扇一折尤所心喜大海潮小忽雷雨詩足備掌故揚州云阮亭合向揚州住杜牧風流屬後生廿四橋邊添酒社十三樓下說詩名曾維畫舫無閒柳再到紗窗祇舊鶯等是竹西歌吹地烟

花好句讓多情自記出山異數一篇述出處甚詳云讀
書山中衍聖公因值 聖駕東巡將臨幸曲阜招修明
禮器肄習樂舞所教共七百人及 駕詣闕里擇期講
書 命擇孔氏學問優長者先擬講章衍聖公令其撰
進維時掌院學士常公書侍讀學士朱公瑀泰山東巡
撫張公鵬與衍聖公毓圻列坐一堂書爲大學聖經第
一節繫詞首節時構思不屬从未落筆張公謂衍聖公
曰可令別坐一室令其從容結撰旣而頃刻就大學講
義一篇諸公傳觀咨賞再令作繫詞解辭以專門習詩
於易實未究心朱公笑曰未通五經何云博學勉爲之

脫稿朱公曰名下無虛士繕清呈進明日引見諭有
數字未妥須再改時跪簾外未知應改何處及發下視
字旁微有爪甲痕者遵照改進明日駕詣廟步行升
殿行三跪九叩禮禮畢步升詩禮堂御座南面立講書
官對立宣講音吐清朗義蘊敷暢上顧侍臣曰經筵
講官不及也禮畢命衍聖公與講書官導引遊覽每
遇古蹟顧問條對詳明深蒙寵眷擢五經博士著有
闕里志聖蹟大備嗜古之士無不推服

顏光敏字脩來曲阜人康熙丁未進士吏部考功郎中
長身玉立音吐如鐘九歲工行草十三嫺詞賦愚山以

爲蒼鬱雄高出入於工部昌黎之間所著未信堂稿制
藝純是性靈結撰無人間一毫烟火氣關倫常題尤悱
惻動人年甫四十而卒有家誠一冊略分次第四四川張
船山得之擇其格言圈出爲加評語云顏星齋明府自
曲阜寄來嘉慶十一年花朝記蓋本顏氏家訓而增詳
者兄光猷號澹園河東運使談笑定營伍脫巾之變有
水明樓詩集弟光敷爲浙江學使廉介著聞所取試牘
人奉爲金科玉律朱竹垞贈詩云每向高堂憂菽水何
嘗太史不簞瓢一母生三偉人當時榮之子肇維字次
雷官行人自號紅亭長翁著鍾水堂詩寶墨堂詩

膠州法黃荅若真以五經中式由翰林爲祕書院侍讀
以布政丁艱不出居林下三十年以書畫自娛嘗寄王
文貞公崇簡巨軸自畫李青蓮登華嶽落雁峯圖石勢
如波興雲卷四壁俱動又以巨幅大書司馬溫公碑筆
勢沉着飛動漁洋題其春雲出岫云兩角孤雲倏有無
雲如奔浪雨如酥杜陽川上支筇客身在春雲出岫圖
先生詩古文皆成家予家有所書巨幅盤曲古勁無時
下習氣不知爲誰何持去

翁寶林先生典試山東時拔取五十三人是時山東額
數無六十九人也都中稱山左是科文空前絕後其實

國朝名士
畢世持趙執信馮廷樞汪灝潘應賓李楨諸名士皆從
落卷搜得非遇寶林先生俱落孫山將向何處聲屈斯
時孫子未先生勸卷亦搜得歎其靈奇超卓而房官塗
抹太甚不可中拆其名乃前隨錢公珥信使院中所心
賞者也召至濟上引見諸當事爲刻其文由是子未先
生亦名滿天下次科遂領解

汪中丞名顥字文猗號天泉臨清人學詩於漁洋著有
倚雲閣集皆漁洋爲之批點品評中丞少時家貧孜孜
好學得漁洋集及所選唐詩奉爲圭臬旣而親炙問字
自序有云山有可仰之歡時無不同之歎余見其集僅

二冊

趙公名良字維林中堂國麟之父也原籍浙江紹興府人國初東南未靖流寓北方家於泰安事父以孝稱既歿相國貧不能葬豫章戴君知地理得吉兆謂相國曰此地欲富貴綿遠則發遲欲速發甚陡但一發無餘矣相國曰吾欲及身耳異日富貴安得見之戴君乃命鑿壙底穿二孔圓若茶盃以絮塞之相國乃葬其祖父後果入相子孫不振少子爲蒲臺學博善畫松按此與孫巖山祖書臺先生事相類孫名繼官長洲知縣高才博學奇門遁甲無不究心又得異僧之傳明季避兵驅盜

頗神其用。峩山幼時先生嘗以所擇二地示之曰：「一極貴而不壽，一中貴而壽。」爾何欲？峩山曰：「貴無壽，其能享乎？」乃用其次。趙相國志在山水，罷官後日遊泰山，作詩作記，無不佳妙，亦福壽兼之矣。過眼空花，富貴誠何足云。

仁國相國繪泰山全圖
遊記述四時之景俱美

張蕭亭實居鄒平張忠定公延登孫漁洋內兄也。作詩盈千首，漁洋爲存三百。夜雪詩云：「斗室香添小篆烟，一燈靜對似枯禪。忽驚夜半寒侵骨，流水無聲山皓然。」漁洋以爲左司門對寒流雪滿山後復得此句。詩集原本「漁洋偶易一字，實有點金手段。」吾淄蒲柳泉聊齋志異。

未盡脫稿時漁洋每閱一篇寄還按名再索來往札余俱見之亦點正一二字頓覺改觀先生筆墨之妙端由心細功深其池北偶談居易錄草稿塗乙滿紙人乃看似容易或傳其願以千金易志異一書不許其言不足信也誌異有漁洋頂批旁批總批坊間所刻亦云王貽上士正評所載評語寥寥殊多遺漏

張稷若爾歧自號蒿菴居士深於經學崑山顧炎武少所可一見心折來往必主其家與汪鈍翁書稱其儀禮鄭注句讀根本儒先立言簡當以其人不求聞達故無當世之名而書實可傳鈍翁論師道書云獨精三禮卓

然經師吾不如張稷若其爲名流傾倒若此所作古文
天道論上下二篇抉幽摘微能發前所未發而文氣曲
折奧衍表裏洞達直入昌黎之室方伯陸朗夫深賞之
選其辨志篇入切問齋或謂其精天文遁甲諸書蜀中
所刻風角書有占風望氣諸說餘不盡載蓋不敢出以
問世也術遂不傳其列仙詩云注老爭傳河上翁文皇
虛訪擬空同乘雲瞥地呈靈幻何怪文成與少翁世爭
言武帝好仙而文帝已啓之不問蒼生問鬼神亦是此
意但未惑溺深耳先生有老子說略二卷

聊城靳文襄公輔久任河督深悉利弊爲本朝名臣功

勲與明之潘季馴相埒歿後立廟河上作河防一覽治
河者奉爲圭臬生平得力實爲幕友陳天裔天裔秀水
人名漢精奇門勾股測量之法嘗過邯鄲呂祖祠題詩
壁上云富貴榮華五十秋縱然一夢也風流而今落拓
邯鄲道敢與先生借枕頭文襄見詩歎賞以墨迹未乾
尋蹤急追得之一見卽契如肺腑凡河防事宜得失變
態竝有先見一時河員皆受業焉康熙二十五年五月
上南巡於行在問曰爾有何等通今博古之人輔以實
告賞漢道銜後遭謗兩人幾獲譴卒得白文襄以爲已
不足道幸不負良友耳後配享文襄廟

兩廣總制郭華野琇卽墨入爲御史叅劾不避權貴最著者如疏劾徐健菴高江村太傅明珠疏載諸公本傳直聲震天下諸公非有專權作奸如前代所指斥第蒙寵眷人爭趨附不免有結納而一登白簡上爲動聽其所遇隆也相傳叅納蘭太傅當其壽辰攜疏稿登門求見長揖不拜而屢引其袖太傅喜曰侍御有壽詩見贈乎曰非也彈章也太傅讀未畢公從容曰郭琇無禮當罰自引一巨觥趨而出滿堂愕然少頃太傅廷訊之旨下矣按太傅本傳無廷訊事所傳訛也又傳公宰吳江簞簋不飾聞湯潛菴撫吳自陳改悔之意請另擇日

到任由是聲名大震湯薦之後湯爲太傅所傾乃劾之
以報師恩按蘇州府志公知吳江明敏果斷能除積弊
令民納銀自封投櫃欠者里正抱木隸往催民無雜費
其廉如是凡積盜倚豪強爲窟穴者悉擒治伏法誠有
如聊齋所記觀此公蓋始終如一素性不移安有後悔
之事當日妙選東宮輔導之人太傅奏學問人品無如
湯某因是內召雖其中不無隱情而在湯有榮無損非
排擠貶謫惟方靈皋記此事隱隱有深憾焉郭公第爲
整肅朝綱起見以私意窺測豈青天白日之胸嘗迎
駕德州敝車羸馬萬人擁擠爭識其面嗚乎榮矣

家成山公鄉謚文恭先生順治庚子鄉舉名士禎字叔子與漁洋同名同鄉同時近不百里或竊有相如之疑非也漁洋在朝更名士正歿後奉旨復其原名各家詩文集所載猶多名士正者公弱冠館於外有少婦時時來窺托故辭去官成山衛教授與張崑崙山人交善序其偶然草云君于詩長于山林景物之作有柴桑籬下風味佳句如書憑雙鯉至秋帶一僧來七言白鶴自成新髣髴青藜猶是舊溪山

傅公以漸字于磐號星巖順治丙戌進士爲開國首科狀元不十年入政府爲武英殿大學士在官食不重味

衣皆再澣平生嗜學手不釋卷著述甚富惜燬於火善書德州李星來家見可園扁上青未了三大字是其所書

鈕玉樵觚賸續編淄川小聖人傳云淄川孫先生名若羣學瞻品端言動有則鄉里咸稱爲小聖人蚤歲成進士謁選京師任少司寇克溥延之官邸訓其子彥方處以廣厦坐不易床供以豐肴食不兼豆雖隆冬盛暑衣冠襜如司寇知孫有二子已就童試適是時山左學使者與司寇有舊將爲之地而未詳二子名屢欲請之憚其嚴正終不敢發先生端居緘默遇有問難輒指畫談

議衮衮滔滔竟畧不倦凡及門與輦下諸子以制藝就正者一一評隲務愜其隱而運之苑枯年之修短皆能於文預決之康熙癸丑出爲交城令攜家以行旣而遺其長子歸淄就婚課以書藝忽驚嘆曰嗟乎吾子其不返乎泣然而別歸未匝月忽無故自縊死治交多異政秩滿遷蜀忠州牧卒於官迄今過其故里詢孫姓名或不盡識詢小聖人無不識也今亦無知小聖人者非玉樵記之不幾湮乎

附青雲之士而名益彰龔勗華鰲與滄溟唱和人幾莫知其爲何如人余見其集大都華路藍縷之風然亦能

自樹立二君皆章邱人與吾邑爲鄰襲勗字克懋少貧
爲人牧豕三十始補諸生時同邑李太常開先袁西野
崇冕方尙金元詞曲勗獨與李于鱗殷正甫以詩古文
相唱和華鰲字空塵工詩善畫有句云秋老畱紅葉風
輕轉白蘋愛此疏林月兼之一磬清雨霽聞啼鳥風停
數落花與李于鱗楊夢山唱和

章邱諸生尤石髮翼宗鬚眉疎秀若神仙中人善畫山
水有倪黃筆意崑崙山人爲選訂其集摘其佳句如泉
經諸湖曲月過數峯寒草烟纏石骨月露滴藤根空天
惟過鳥老樹月生秋山帶黃河轉雲隨上黨開老鶴棲

雲木飢鴻食雪田峽逼天光窄林疎月色深綠窗蕉影
暗紅葉雨聲沉夢老三朝客雲迷二室春夢迴驚客至
病起爲君來一與青山別同憐白髮侵草隨人意亂雪
向髭毛低虛壁嵐光斷平池樹影深路遠書難達詩成
病懶題半塘菰米瘦八月短風吹往來聽曉梵今古送
寒潮

趙晉石金人邑諸生號月麓築借山樓於甘泉月嶺之
閒藝樹種蔬嘯咏自娛所交皆知名士嘗遨遊秦楚吳
越閒四方賢士大夫來淄者亦必訪借山主人信宿流
連濟南胡春以鵝管作笛有穿雲裂石之聲爲章邱李

太常中麓所賞咏之云明水市頭傳雅製太常席上擅
新聲周亮工侍郎過章邱猶見遺製追憶云鵝管檀槽
明月夜百年猶按奉常歌晉石與崑崙山人交山人八
哀詩云幽怪勝廬仝險峭壓顧况鏤辭與匠意慘淡多
奇創其爲人可想見矣

給諫孫公樹百名蕙浩氣英才千人共見立朝敢言皆
關天下利害令寶應時河水淤塞河使欲以挑濬難之
遲則白簡從事民間之一呼羣集七日而工畢繪濬河
圖婦人孺子亦以衣襟盛土其得民如此嘗訪醫廬阜
間危坐五老峯巔數日性愛山水園中築亭爲萬仞芙

蓉齋堆巖布壑種樹蓄鶴蕭然物外博山亦築有別館
流泉曲曲萬木龍蔥擅邱壑之美又喜聲伎金粉羅綺
列屋而居歿後燕子樓空春隨樊素一時歸矣臺榭圯
傾荒園草沒後來遊人爲唏噓焉著有笠山詩選漁洋
標其佳句如禁烟寒食路霽雨杜陵春楓丹千籟發山
紫萬蟲悲一帆涼月轉四面翠屏開七言河聲入洛三
門合嶽色來秦萬里明島藏諸國晴時見風捲洪濤靜
夜聞

王漢淑敬公商河人以進士爲四川屏山令蠻匪來攻
拒之於東關射賊首中五箭死餘皆遁是時山苗賊爲

亂眾號數萬率數十人擒其渠魁眾潰散可謂民之父
母國之干城矣家居歲飢有積券可二千緡請於父焚
之在官值凋殘之餘招徠遺黎有循聲四川通志不爲
立傳多經兵火太平之後遺老盡矣送黃生袞之何將
軍幕云遠眺松州路青城半壓雲雪花經夏合岷水入
江分匹馬依山轉孤筓亂野間指揮西塞靜髯不愧叅
軍詩蓋在蜀作兵荒之景在目豪傑於此不得以功名
顯惜哉

京師琉璃廠買得大司寇翁寶林年譜一卷述其少年
苦况幾欲沉淵葬魚腹中冒通州籍應試學使蕭公取

冠一軍眾大譁攻之急不敢覆試蕭公問何故未來教
官對以暴疾卒蕭公歎息爲刻其文有叢蘭秋風之語
後入翰林見蕭公執弟子禮未言蕭爲誰也後乃知爲
吾東德州韓坡先生先生學差竣卽告歸所居曰雲莊
傍河爲園築茅爲屋編槿爲牆日與逸老杯酒獻酬而
又遊覽名山涉歷江湖興會所至援筆爲詩嘗出其但
吟草以示山薑山薑曰此夢山之淡逸邢子愿之流美
劉函山之雅潔也蓋皆以鄉先輩相况魏環極尙書方
柄用與平湖陸清獻吾淄高念東等十人同薦皆天下
之選公名惟豫

吏部王念菴沛鹽諸城人康熙甲子舉人佐川餉得員
外郎歷官吏部侍郎加左都御史時助餉者皆自運軍
前至棧道險處肩輿失足落澗中幸掛老藤以長絙繫
起於時夕陽將下竹樹陰森猿鳥亂啼山嵐四合不能
抵旅舍循微徑至蘭若山門外緇流拱立見公稽首曰
弟子敬候久矣驚問曰公前身吾師也夜夢神告以今
日至導觀僧遺像與公無二乃恍然有悟問爾師生前
作何功德曰焚修而外日惟趺坐因山中乏水乃於石
隙鑿泉深數丈工費不貲皆師苦身募化汲引之外旁
及田家咸資灌溉公太息久之與僧罄談至曉乃別伯

父鏃官江南布政捐金贖難民著有破夢齋詩草父鏃
號任菴嘗官粵西策尚可喜必叛告歸有世德堂集兄
沛恩官中允有儼若堂詩集公未有集而詩亦清絕惜
不多作

山東學使後人立廟祀之者薛文清公瑄王文成公守
仁二公理學大儒而於制藝亦復精深文清在浙考試
得徐渭卷以其文爲鬼語文成古文人共推服兼長於
詩本朝學使最著名者無如施愚山山左奇才無不賞
拔有冀北空羣之目康熙丁酉春考試東萊唱名甫畢
雷雨大作平地水深尺餘雷聲洶洶如崩屋諸生雲集

堂上不能作文先生從容賦詩云滿目明珠絳帳開久
晴一日走風雷敢言化雨隨車至應有蛟龍出水來咫
尺蓬萊山可移雨師風伯颺靈旗從教滄海添春漲會
取珊瑚百丈枝復命諸生屬和其風雅如此習有蘧齋
詩話搜羅甚富朱竹垞靜志居詩話多採之虞山摘滄
溟幾無完膚施在濟南爲之樹碑立後誠古之人也先
生在諸詞人中理學獨深而不講學漁洋深愛其詩爲
摘句圖記之溫雅深醇有餘味焉

康熙閒山左名臣勲業之盛推武定李文襄公之芳當
逆藩倡亂公制兩浙賊氛方熾駸駸東下公以衢州爲

要衝馬九玉奪仙霞嶺公據關擊之與士卒同甘苦躬
擐甲胄親冒石矢鎗砲雨集之時旁人見公左右耳各
出蝙蝠飛翔上下不至受傷疑爲神佑當是時賊督十
萬之眾依山附谷卒不得逞大功因以底定紀文達公
往閩過仙霞嶺作詩有云迂曲得人蹤一綫微通步仰
睇鬱嶒峻俯窺杳烟霧隔江見行人蠕蠕似蟻附高者
木梢懸卑者草際露前者僕而援後者聳而赴石磴滑
而顛林風吹欲仆徒侶遞相呼十步九迴顧慄然悸心
魂失足愁一誤側聞定鼎初狂童此負固桓桓李文襄
轉戰實茲處仰攻彼尙克徐行今乃怖人生才地懸寧

止恆沙數昔阮亭咏文襄公文武共推周吉甫勲名誰
竝郭汾陽長山馬子琴議其用典色舊且屬虛響若此
詩意不在頌文襄而因其境之險想其功之難較爲切
實自著定亂紀敘平賊方略甚詳獲囚訊後多寬宥不
以多殺爲功振往來
飢民活人一百二十萬 公字鄴園官文華殿大學士

江南總督兵部尙書董公默菴訥平原人康熙丁未探
花督兩江時有縣丞于宣駱龍友爲屯官虐民民多失
業公以事至宿遷有卓生控屯官平其三世墳墓勘實
立鎖于宣駱龍友裂其衣捽其冠足蹈之聲淚俱下誓
不與此輩共生小兒拍手笑云拿于駱矣奏聞盡以

屯田還民民慶更生爲立祠後調入京郅吏議次年

駕南巡鄉民數千求仍放董爲江南官回 鑾公迎

駕召至舟前曰汝做官好江南人爲汝蓋一小廟矣因

大笑旋有總督漕運之命康熙四十一年 聖祖南巡

駐蹕柳村之南樓 御書眷念舊勞命懸之墓所著有

柳村詩集 上命其子吏部思凝繕清呈覽始終眷遇

如此

吳克菴自肅長身偉貌步健聲宏讀書過目不忘精韜
略技勇上馬殺賊所向無前綏帶論詩與阮亭主司寇
蒙齋田中丞相左右實侔儻奇偉之士也而官止叅議

多歷憂患劉訥菴懷人絕句云黃昏哀角滿鈴岡多少
降旗下夕陽只有錦江康樂令春風吹淚兩三行此逆
藩作亂克菴不辱僞命而作按詩用錦江似曾官蜀而
蜀無康樂克菴令江西萬載而萬載不名康樂未詳也
克菴海豐人

朱子青湘候補主事不仕家有園亭之勝好賓客日以
稱觴賦詩爲樂學詩於漁洋受知於山薑作詩甚多
家所有特楓香一集山薑摘其句云三閒竹子桐絲屋
一尺荷花蓼穗泥老木晚風聲瑟瑟小花秋焰影垂垂
紅透楓香霜後葉白開蕎麥晚田花夕陽半露烟中塔

黃葉全遮郭外樓
蘆筍下抽三寸碧
柳絲纔放二分黃
麥浪翠邊風舞燕
花鬚紅外客騎驢
最愛白雲聯絡處
更看蒼雁兩三行
白菡萏垂經雨
重紅蜻蜓出帶香
飛殘星數點
月將落老屋一燈門未開
年未四十而卒後
續刻山左詩鈔
朱氏詩人尤多

予青厓城人弟綱巡撫廣東亦能詩

張崑崙山人篤慶詩名甚著有弟履慶號顧齋增慶號損齋皆能詩兄弟互相砥礪而各不相襲顧齋因大水寄訊袁松籬有云吁嗟昨日西山頭突見觝觸紛如牛黃髮老翁驚且憂風雷颯颯雲烟愁急雨翻空便三日彷彿銀河漲天出百川泣沸魚龍驕狂濤夜落高村失

松籬曾記家中書籍漂沒卽此時縣志有云日暮有人見兩牛鬥山上歸語父老有識者云大水將至宜急遷其言果驗疑亦此時事也損齋長信辭云天街雨過草萋萋長信宮中烏亂啼莫向秋風泣紈扇昭陽人在畫樓西

李鴻窪字季霖號厚餘順治辛丑康熙甲辰進士官元江知府父采蘭隨母改嫁蘭呼某爲父共耘於野見縣令輿馬赫弈問何爲者曰官也問吾何不爲官曰官從讀書來豈田舍兒所敢望問吾何不讀書曰家貧如此安能供脩脯蘭默然俄折其鋤柄某爲易之再易再折

某嘆曰我知爾志與粟數斛令去蘭時年二十五矣乃磨麵賣不托執書一冊逢文士執裾問字且賣且讀吟聲不絕于途有憐之者招入塾暇與講習久之學作文質甚魯一日呈文師閱畢曰休矣汝非此道中人蘭涕泣堅不徙業讀倦隱几而寐夢入一洞曲折幽闇用力向前良久忽出開亮如別一世界驚寤汗出心覺豁通躍然謂師曰吾悟矣命題試之果清順自是功益倍文亦日進遂入泮娶妻生三子親教之二子成進士孫弱冠亦捷禮闈公有折鋤記以明經終此事聞新城人傳說傳云子鳳翥鳳壘按沈廷文李公墓志名鴻霏分校

北闡能得士有觀海餘則滇南諸集

成其範字愚崑漁洋同年也通天文吳逆據岳州密疏
克復日期及擒吳琮皆能預知其學傳河南劉石渠占
皆奇中爲贈尙書盧公夢山道悅所取士公卽雅雨先
生父也人以爲得神仙門生又善跣病以足加病人背
腹按節跣之足力到處卽愈病重者往往得一睡及醒
則沉疴霍然 聖祖仁皇帝得症公廷薦 聖躬立安
命會試以老病辭按成愚崑家藏天文圖一紙大於一
閒屋分周天度數十二次其閒星列如米非尋常所能
識他人按星測之亦不驗細於毫髮非手口親授不能

得其訣也成樂安人

膠州高西園鳳翰名士也善草書工畫嘗見其畫花卉
竹木潑墨淋漓氣韻生動有人送富室求售富室不顧
吾邑翟竹坡見故紙堆中草書一卷主人視爲棄物乞
得裝屏八幅龍蛇夭矯古勁蒼鬱見者欽爲至寶而不
入時目可慨也父任淄川學博西園隨侍最久故于淄
交遊最多所畱墨迹亦夥嘗夢一客來謁名刺爲司馬
相如驚寤越日得司馬相如私印古澤斑駁篆法精妙
歷城朱青雷震得卓文君印欲求之配爲對而西園恆
佩之不去身非至親不出以示人分發揚州候補州倅

盧雅雨奇賞之欲薦引并爲忌者所劾有詩云幾曾連
茹茅同拔却爲鋤蘭蕙竝傷西園多髯袁簡齋以爲貌
似其父右肱廢左腕書更有奇趣尤豪于詩酒酣落筆
立就嘗以雁字詩數首呈尹文端公公亟口歎賞以示
座客歿後雅雨哭以詩云最風流處却如癡顛米迂倪
未是奇再散千金因托鉢已殘右腕更臨池殷生瀟洒
談元日戴椽昂藏對簿時見說淮西傳故事遺文爭患
少人知讀此詩足見生平

盧雅雨先生名見曾字抱孫由庶常改官知洪雅縣事
蒞任八月除不便於民者數事著有雅江新政人多傳

誦加意士林建書院與諸生講論不倦尤切於地方者
莫如詳禁開礦一事略云瓦屋山外環雅州榮經峨眉
夾江諸州縣內通各洞生蠻山則確乎有礦礦則斷不
可開洪屬瓦屋山梯九溪等處田地不足養贍聚數千
百開礦之人坐食其中米價日增且絕糧矣害一米價
增則生計日窘逃亡日多一開礦而遂至失業害二洪
邑地瘠民貧一切斫柴汲水負米豢豕皆婦女往來山
谷一旦聚數千無籍之徒於人迹罕到之處城市既遠
法令難施姦淫盜竊弱者受其魚肉强者或觸兇鋒不
但盜案盈牘而且人命如草菅肆毒於民而卽貽累於

官大害三也查明季碑文稱地產銅鉛奸民糾黨開礦
擾害鄉民輕惹蠻患害已見於前車矣高山峻嶺奔騰
超躍華民之所難山蠻之所易大利所在鼓勇而來邊
釁一開不但種禍於末吏而且貽慮於各憲大害四也
凡此四者有一於此縱使金銀爲山猶不忍爲况白鉛
乎大憲善其議遂止收六安州最得民心方貞觀贈詩
有句云才比寇公饒學術清如包老近人情後轉運兩
淮謫戍塞外商人以薔薇露洒其衣有夏之璜號湘人
者六安人素受賞識來祝壽適有軍臺之命湘人毅然
請從行高西園贈以詩椽筆能投事更夸烏孫相伴走

天涯蘇門不少秦晁客只吃龍團餅子茶吾溜張榆村
送雅雨出塞云廣川柳色入秋寒暫拂征衣指賀蘭紫
塞關河沙外轉黃雲驛路馬頭看詩臨瀚海風懷壯醉
倚天山襟抱寬早晚賜環蒙異數論功應更列朝端後
復官在揚提唱風雅一時名輩歸之如流又表揚幽隱
刻山左詩鈔及漁洋感舊集在洪雅時因蜀有黎風雅
雨之謠立望春雅雨諸勝因以爲號

山左詩鈔盧雅雨先生主之而選擇則廉訪宋蒙泉先
生爲多先生名弼宗法漁洋所取大都清醇雅正一切
纖側怪譎概置不錄其餘僞體以晦澁爲幽深以詰曲

爲古奧以枯淡爲高老以浮艷爲才華以粗獷爲豪邁
後來所矜尙皆先生之所裁也雅雨聞見宏富博徵遠
引足以論世知人雖未有詩者每附見焉極意搜羅爲
功於桑梓甚巨雅雨及見漁洋蒙泉於秋谷晚年得接
風徽作詩壽之結云何當奉几杖親到李膺門其推尊
如是嘗續選高念東先生詩以補秋谷所遺主講濬源
書院一時才士裁成甚多與雅雨同爲德州人交相善
也其間叅訂若紀曉嵐惠定宇王蘭泉嚴東有諸先生
皆天下間人又借書於黃崑圃馬秋玉兩先生閱五年
而成書宜爲鉅觀非後來所能及

盧雅雨先生畱心風雅一時壇坫之盛名士宗仰昔郭
華野總制與漁洋同在坐雅雨謁見郭謂漁洋曰他日
繼君者此人漁洋領之郭公知人之鑑不虛也先生得
罪後家籍沒公子漂泊上渤海公詩云城旦餘生剩藐
孤十年漂泊到江湖桐花久墮懷中羽香飯誰拋屋上
烏踽踽葛衣畱凍骨栖栖蹇足耐征途年來鷄鶩同爭
食不是當年小鳳雛拂拭知誰眼獨青襦褌弱鳥許梳
翎量來碧海輸愁淺嗅到黃梁感涕零將母誰憐棲逆
旅忍飢猶勉誦殘經簫聲吹徹吳門市敢望山陽舊雨

聽公子名謨舉人張
榆村先生門人

張榆村先生元崑崙山人從姪也于時藝功最深刻有
書香堂集王罕皆先生爲之敘及門中鄉會試入翰苑
膺顯仕者甚多盧雅雨先生深相推重歲以二千金延
課其子所刻漁洋感舊集共相叅訂考証又好爲詩崑
崙山人奇賞之刻有綠筠軒詩集生平爲文造次不離
館濟南李氏士琛士珠兄弟受業去吾邑二百里忽先
生家信至子婦俱亡子名作哲才最敏讀書刻苦父子
爲諸生時先生語人曰入場吾不畏他人獨畏吾兒乾
隆間先生鄉舉作哲後亦中式爲學博至是卒先生暫
歸畱課題弟子以先生斷難早回恣意所爲方在場觀

優忽家人報先生至驚駭進見先生問課畢否答以尙未騰清乃連夜草進先生閱竟曰余途中擬作幾篇取示學人心細手和如平時涵養之深如此士琛子湘嘗對余云爾及門曾公尙增周公永年二先生服膺尤深先曾大父亦延于家課讀年七十餘矣先生父永躋亦孝廉

諸城劉文正公一代名臣勲業在國史薨時無病上朝坐化輿中玉箸下垂上聞震悼親臨賜奠入門卽哭回鐸輦中猶聞哭聲至東華門始止自古君臣相契之深生前魚水歿後傷悼未有過於斯者先世貴顯至公

官愈尊而貧如故第宅不修車馬不飾貴後老僕猶呼
十二叔有教以呼大人者公聞大怒如東坡教壞司馬
公家人也汪文端公有咏杖詩公爲改末句云入手先
思放手時何等見地趙雲松素遊公門記其一節足徵
除弊安良之心河決陽橋公奉命往塞柴薪皆數百里
外百姓車載而來某縣丞掌收料畱難百端公微行河
干見薪車千百輛私問得其故大怒請巡撫奉王命旗
牌至縛縣丞欲先斬然後入奏巡撫及司道爲之長跪
良久始釋數千萬料物一日盡收卽此細事宰天下可
想矣

章邱李叅議雪山名慎修身不滿三尺而膽大於身遇事剖決如流與德州盧雅雨同年相善好爲詩才情縱逸下筆千言立就一時山左有兩短人之目又喜和人韻盧規之不聽投以詩云舍人官鈍貌尤癯籍甚才名壓帝都每以歌行矜短李笑將月旦詡前盧海分萬派流爭別絃解無聲調始孤底事論文工奪席翻教四座避狂夫李和之頻押盧字不工乃遜謝焉授御史數上疏論事有詩云老成豈敢當天獎孤直由來自性生其自命可想

曾南村尚增厯城人吾邑張榆村先生高第弟子也有

自記一篇云初受業於先生當時新入泮見坊閒墨卷多是官樣濃重之文以爲應試必宜如是提筆效之不爲先生所喜一日偶出先生翻案上書籍見增童時課藝本輕靈一派大加激賞詰近日何不爲此而趨癡肥耶以所見墨卷對曰勿須向後只宜如此做去學問曰充則波瀾自富中會何難由是改轍遂登甲科蓋書之以志終身得力竝示後人其文甚長撮其大意如此以庶常改牧蕪湖與陶西園同舟訪袁子才一路唱和云潮通燕子趨京口帆帶蛾眉認小姑風微漁火重生焰寺僻鍾聲乍代更刺郴州署中火女救母母病不能遽

出女被焚死郴人立孝女祠歷城縣志亦有傳甚詳惜不記

長山袁愚谷守侗直隸及東河總督居喪猶命理事受眷之深如是後官刑部尙書爲刑部侍郎時劉文正公以大學士管部事一案俱畫押矣惟公不肯請曰此案尙須斟酌文正怫然曰子理刑部多年不及君耶拂衣竟去公亦隨行未至公第已遣人來請公親出迎曰子悞矣君言是也自此大相知愛著有詩集和平溫厚紀曉嵐先生爲之序少時見之今不復記聞公藏有二鵬蛇共在盒中盤曲夭矯肉翅宛然身僵不腐未知何故

遇婦難產入室啓盒其胎立下亦奇物也不知落於誰

手

使四川見李雨村太白詩序爰之及卒雨村有詩哭之公有年譜一卷

劉石菴相國文正公子幼卽工書殿試卷前十本進

呈已列第一 高宗皇帝欲得寒畯遂拔吳雲巖鴻居

榜首相國終以書法名天下謂古來善書者惟飛而已

趙文敏能飛而不飛董思白不能飛而飛此千古創論

亦確論也生而身僕不近女色置妾惟供臨池之役俗

傳爲南極老人轉世無據也嘗得藏經殘帙識者謂閱

千年古色黯然如彝鼎題咏甚多居官風骨甚峻潔如

冰霜德望重朝野所作詩卓然成家則人未盡知也繼

母太夫人隨孫吏部在學使任公奉 旨往祝 賜予
便蕃世以爲榮聞嗣孫居京師不能養僕從廉吏之子
孫如是

宋秋巖名云鈇歷城人與申清壑同里並有文名吾邑
張榆村先生與之友善所刻制藝申宋二公選定爲多
秋巖旣連不得志乃閉門授經及門多取科第以去如
毛太常輝祖曾太史尙增皆高足也所居環山背郭茅
屋數椽花竹扶疎皆其手植雖四壁蕭然而卷軸尊彝
粲然滿目榆村先生每造其廬談讌終日秋巖幼有神
童之稱秋闈屢遇賞音皆以他故不售非戰之罪也周

林汲先生選其文入制藝類編

胡西溪訓侍郎念東之甥也少孤性方嚴教授生徒應對進退循循有矩矱衣履亦不敢華飾出行閭里不問而知其爲胡先生弟子也詩才清雋自抒胸臆與張榆村爲詩友手批漁洋精華錄丹黃精細不濫爲贊揚而以世之目漁洋無骨力者爲皮相著有西溪遺詩所刻不多而清逸雅淡超然塵壒之外宋蒙泉先生爲之序深推許焉

張廷敘邑諸生余戚誼也在外日久忘其號少有才藻工詩娶仇氏甚相得仇氏卒作哭花詩上下平三十韻

大似李義山續娶新城于氏方城先生之妹也通書能詩嘗作紀夢詩有序云見高山大水宮觀秀麗金蛇玉兔恫恍迷離文甚怪偉後來多驗詩僅七絕一首略見大意而已續山左詩鈔僅取此詩而遺其序可謂買櫝還珠在集中亦非出色之作當日夫婦唱和相好無尤同觀道書悅金丹之說一意修養夫忽心迷捫婦髮使入竈幾死爲人救出于氏大悲歸母家與夫絕方城先生與外王父交善命舅氏蘇山從于氏授經張作懷友詩皆古體中有小山居士謂先王父也方城先生善書不由恆蹊與先王父亦善

竇東皋先生光緒幼從太翁館吾邑翟氏園素有鬼天
晚時人不敢入同學輩戲引入閉其門及出眾問所見
曰無他有羣鬼呼大人遂戲以大人呼之官果至都憲
屢掌文衡乾隆乙卯主禮闈王以錡王以銜兄弟中第
一第二殆如郊祁盛事因忤和珅意謂元文有竇字似
關節又俱從落卷中搜出可疑策題亦多誤 上謂其
文卽佳亦不應兄弟聯名且元文參也魯句有云日有
萬幾思兼四事此等典故人君可用曾子人臣亦孝子
也不應用置之榜末竇亦降四品京官及殿試 皇上
欽定狀元仍以銜也眾論乃息東皋先生制藝一本先

正渾灝古茂之氣追踪歸太僕張嘯蘇擬之華嶽三峯
當聖駕巡幸浙江作賦用古韻汪洋浩瀚五色陸離
如讀南京三都之作見者欽爲三代法物著詩不多刊
落浮華骨力蒼堅卓然拔出流俗之外屢視學浙江當
時文人揣摩風氣破必三句承題二三行小講二句競
爲短篇所謂世人但學蘭亭面欲換凡骨無金丹也在
吾邑爲人書屏書法亦蒼勁與齊次風召南劉廷槐耕
南善二公皆一時宗匠先生有馮敬通之恨歿後家人
幾無以爲生聞浙人云試歸安時卽乙卯會題二王皆
居二等及禮闈乃莫之或先又從落卷搜出難免物議

然謂先生愛才之過有之至納賄作弊決其必無厯司
文柄一貧如洗先生身後之窮扼非爲代白其謗歟本
朝制藝推李文貞公光地與先生論者莫能軒輊

益都李南澗文藻好古工篆隸尤精經術貌黑而髯其
生之前夕父夢鍾馗入室而生厥狀肖焉與周林汲周
肅齋兩先生交好修四庫全書林汲被薦入館賜編修
不能無望嘗以詩寄肅齋歎無知己之援引也予有其
詩集兩部後皆失去在廣西爲令時示百姓云山東諺
語牢須記納了錢糧不怕官

李憲喬字義堂號少鶴袁子才遊粵西相見甚歡別後

李使人追寄以詩岸邊雙樹林來對兀沈沈掛席去已
遠別醪空自斟烟寒過客少江色暮樓深誰識此時際
寥寥千載心湘上云孤月無人處扁舟先雁來皆高淡
可喜少鶴歸里有謝際昌送行詩云官貧歸棹易民愛
出城難

朱海容名承煦主京口海岳書院年七十矣袁子才來
訪畱飲子才記其贈內云剪刀聲歇栽花後井臼功餘
問字初其風流可想也

詩話云山東未
指明何縣人

高密三李詩名甚著大都清真刻露刊落浮華憲喬尤
為當代名公所重與兄蓮塘石桐等選唐人詩作主客

圖以張水部賈長江爲主餘人爲客遂號所咏爲二客
吟懷民贈人盆桂云送花如嫁女相看出門時手爲拂
朝露心愁搖遠枝送張明府云在縣常無事還家已有
身隨行一舟月出送滿城人憲喬咏鶴云縱教就平立總有
欲高心不辭臨水久祇覺近人難送流人云再逢歸夢
見數語此生分袁子才以爲與浪仙相近

周林汲先生字書昌名永年歷城人嗜古多聞讀書過
目不忘以薦入四庫全書館賜編修典試貴州落水以
救獲免後又放山東主考大臣奏係該員本籍乃止家
酷貧趙渭川助以金竝贈詩云髯翁貧病今猶昔時欠

長安賣藥錢堪笑石倉無粒米亂書堆裏日高眠論者
謂絕似先生行樂圖與先王父交善嘗以商彝托先王
父代售其清況可想性好書有僕四人專爲收掌先王
父在都日寓舍比鄰朝夕過從家僕田升亦代爲經理
所刻書多寄余家代爲消散其家藏書最多先生在館
時蒙 上垂問家藏書籍刻有書目二部遂以進呈點
出一千餘部進之後印以 御寶發還堂官某求暫畱
借觀未數日而其家籍沒書遂入大內矣出門每以五
車自隨在德州書院將歸以書寄朋好處速返而其書
盡爲人竊去在濟寧時畱書某家爲水漂去子東木名

震甲爲河南太康令以二千金往江南買書以歸家中
無人戚某守宅書籍古玩字畫盡爲所鬻及歸里問所
藏則零篇斷簡無一全者先生在日常以鈔本三十種
質於四川李雨村雨村於逆匪之變萬卷樓被火焚未
盡者亦被人搶去所選制藝類編幾於家傳戶誦四川
亦爲翻刻與紀曉嵐先生同年邵二雲輩契厚皆一時
推爲博雅者也先生晚年喜談禪濶翻釋典見僧輒舉
佛經相與辨難不解卽以杖擊其禿頂孫宗耀號溪亭
官四川崇慶州州同與予同宦一方相見如故升貴州
廣順州知州歿子如璽號寶傳余招致來榮

平原董曲江元度由進士入翰林散館改知縣復以不
勝任改敎告病歸博雅好古爲紀曉嵐先生推重詩宗
漁洋山人和平蘊藉機趣洋溢惜後人衰微將家藏書
籍售於牙僧零星販賣予見各本俱有先生圖記紙板
精好不知散落誰氏爲之太息少年時夢人贈扇上題
詩曹公飲馬天池日文采西園感故知至竟心情終不
改月明花影上旌旗尺五城南竝馬來垂楊一例赤鱗
開黃金屈戍雕胡錦不信陳王八斗才簫鼓瑟瑟畫燭
樓是誰親按小涼州春風豆蔻知多少併作秋江一段
愁語多難解

德州李亦堂好古耽吟咏著有結廬詩稿宋蒙泉先生
爲刪訂佳句如暗階鳴絡緯長漏轉牽牛游雲凝作勢
獨樹淡生花人歸楓樹渡童候荔支門荒徑生秋草層
垣上古苔微風螢火亂細雨雁聲遲七言若夕陽無際
憐芳草春水依然悵綠波青山有約埋詩骨綠野無期
遲酒人薜荔牆欹蜂落子林於徑溼柳垂絲滿院秋聲
過白雁半簾寒雨對青鐙

桂未谷馥工漢隸筆畫如鐵似古人復生爲長山學博
嘗書史晨祀廟碑贈先君爲劉寄菴題抱孫樓扁寄菴
云我有抱孫樓未谷爲書扁遂令數椽屋高於千仞巔

未谷工古書漢隸秦之篆筆勢如龜龍非徒勢蜿蜒所
藏石綠鉗明供御物也徑二寸厚四分面文曰龍香御
墨背曰大明隆慶年製皆正書輪旁朱篆重三兩八錢
多咏之者後爲人得去得竹根磊砢刻如來遂刻歲星
壽星於側謂之三壽作朋翁覃溪學士題字羅兩峯繪
圖亦韻事也未谷所交皆天下名士在京師與諸公唱
和聲噪輦下晚以乾隆丙戌進士爲雲南令意甚不樂
作簪花騎象圖竊學升菴以寓牢騷之意徧徵詩題詞
任太和時寄菴至其署贈詩萬里南冒雪鴻痕客來如
到古邱園栽花自愛衙齋僻問字人知几席尊名士風

流今未遠窮官氣味老猶存相尋只續遊山記急典衣裳治酒罇性嗜酒詩多酒後作以八分書之輒爲人持去比醒都不記孫顯忱拾其餘錄爲東萊草有句云到處勾留因嗜酒有時懊惱罷題詩

新城伊應鼎性詆諧善于談詩時人比之匡鼎少年時猶及見漁洋選漁洋詩二冊自爲之註紙板精好較精華錄僅三之一其中評論自出新意不似註精華錄者但引典而於詩意無發揮也宋紫泉云親見平子三倒來亦言其談詩之妙爾

朱文震字青雷歷城人少孤家徒壁立好學善八分書

游曲阜徧觀秦漢碑刻坐臥其閒者累月慕太學石鼓
杖策游京師爲紫瓊巖主人所賞識所見古人法書名
畫日廣初學寫意花卉翎毛繼則擅長山水幾奪麓臺
石谷之席初宦西隆州州同會開四庫全書館處校篆
隸之員奏授京秩爲詹事府主簿

樂公名廷珍考遺不錄徧求當道無應者後求撫軍夫
人轉送學院補入途中解元夫人認爲門生聯捷爲主
事擢郎中凡二十餘年方爲員外郎初相國某至其部
日已夕矣諸司無人獨樂坐守一編問之曰坐此以待
公事相國歎息而還及郎中缺員相國閱籍見其名乃

補之某侍郎爲座師憐其貧使視漕通州授意謂但云米不佳千金可立致及呈米無言空手而歸侍郎責問良久對曰其米誠佳安得言不佳左右皆笑侍郎亦曰子誠廉士不能爲子謀矣

劉松嵐觀察風流自喜酷好高密李石桐詩因學之余於平原張雨田處見其詩僅一冊晚年作也風格蒼古不染時蹊松嵐愛張船山詩每摘句錄以贈人後載與友人札云妻妾釵釧化爲柴米其清况可想爲同鄉初願園尙書劾罷

山左理學推安邱劉直齋先生近時人則閩考功懷庭

爲最名循觀昌樂人吾淄有應試省垣者見先生衣冠
質樸貌不驚人而言動有則無不敬服考功少孤葬親
處卑溼冢爲水啗大陰雨輒號泣不食繞墓走達夜以
是得羸疾卒改卜焉直齋自序其學云始去外物而見
身繼去身而見心又去心而見理考功以忠恕爲根本
以倫常爲實際毅然以絕學爲己任二君一似陸一似
朱門徑不同而同歸聖賢一也考功額二親所居曰思
劬齋以志痛每問伯叔以父之容言嗜好能爲古文文
不苟作作必有爲小記刻峭似柳州一遊一息皆有學
問存焉直齋與吾淄孫若羣先生爲濟北大儒考功與

膠州法鏡野濰縣韓理堂以文學行誼相切劘

韓理堂名夢周好古文時藝亦樸實說理如數家珍令
來安地瘠民貧勸農桑崇節儉值大旱禾稻盡枯請上
憲入奏發倉振恤民慶更甦當時百務勞心發爲歌咏
名憚暑吟以寫憂憫之懷嘗見其嗣於濟南樸野如農
夫視世之居官署厭膏粱者異矣

紀曉嵐先生視學八閩邀吾鄉趙春澗同往先生先行
春澗自山東日馳二百里及之一路唱和曉嵐先生以
長句首唱索和戲促諸友春澗詩後至又促之春澗善
說鬼數十晝夜不窮在京有鬼董狐之目曉嵐子汝傳

朝夕勦之令談先生嘲之云甘心伏轅下侗促跛羊如
終朝邀稚子神怪談虞初諸友詩皆至作詩相謝兼索
和章春澗詩又不至乃倒疊前韻以惱之因春澗好飲
詩有云可憐一蹶竟塗地險韻坐困敲枹交睢盱四顧
上舵尾苦問何處酒旗挑賓主相得之樂如此及見春
澗詩和韻皆在集中其倒疊前韻詩風馳電激英英露
爽曉嵐先生詩云山東健兒天下勇士風慄悍連滌濠
當之洵不愧也春澗善畫詩筆敏捷京師諸大僚扈從
出塞每邀與共往閱山川之奇險歷風霜之凜冽詩情
愈豪每有翰墨事操筆立就故多屬其捉刀而終身未

列科名隱居田園喜其稚子應門云解道阿翁不在家
甘於韜晦矣閱其詩忽忽二十餘年忘其邑竝忘其名
要爲濟南人歸里時當再考也

以德州人

董香草芸平原人作詩不求奇不務華清和宛轉情詞
亶亶動人曲江家法未墜也嘗作濟南絕句百首蓋繼
王考功季木齊音而作劉寄菴題其卷云問山亭中詩
百首云是齊音古未有才雄氣健易語言未免砭砭雜
瓊玖又云平原香草今詩人風度曲江有爲後偶然寄
迹芙蓉泉閉門捫句未肯苟旁搜非欲掩前賢博採方
將稱尙友結云季木不徵騷雅音香草却擅風流藪濟

南自古名士多如此詩人再有否香草蓋籍平原而寓
厯下抑揚之間推重獨至非輕許也

家族有名勸者余尊行忘其號性冷峭孤僻寡交遊潔
癖如倪迂偶有客談去後必滌其茶碗洗其坐生平不
入廁至村外幽僻處還必數濯其手晚年無妻無子或
寓僧寮教讀嚴厲弟子衣履無聲咳唾不響頭容直視
容端洒掃進退皆有紀律有富家兒不在門下數年矣
買得駿馬村外馳驟望見先生肅然下馬侍立先生責
以輕浮立令斥賣唯唯如命蓋余生三十年前吾邑師
道無不尊嚴而先生尤甚好苦吟作詩不求人知每成

一篇點竄畢團紙棄置或付丙丁不知誰何檢其殘篇
得二十餘首錄之持示劉寄菴寄菴深服以爲幽淡閒
寂四靈一派也記其絕句云夜靜霜氣寒鐘聲渡水去
吾性本空明山僧自多事所作大抵類是

嘉慶壬戌二月巳酉湖北教匪肆逆我師失律深入山
巖喪將弁五十四員總兵王懋堂福山人參將胥泗起
歷城人俱陣亡劉寄菴作詩弔王將軍云嗚呼賊勢何
猖狂妖雲掩日天蒼茫好出奇兵善制勝軍前殺略難
相當山東猛士有王郎氣如彪虎驅羣羊宜有英風落
賊膽何期遇伏身先亡將軍年少魁多士軍中喜見晉

龍驤凱歌未奏輓歌起白虹萬丈經天長胥將軍云將
軍義不死牖下破產千金置駿馬身經百戰無完膚血
色殷紅上鞞袴又云虛孤旺相誰曾知爭關奪隘由人
爲霧渡河邊命如草飛烟縱火殲王師敢惜孤身奮力
戰頭中礮石身中箭小臣一死真無能不怨大師不救
援按王子文亦有詩弔胥叅將謂公稟大帥不宜深入
弗聽遂遇伏敘其死甚慘蓋寄菴在福山聞王鎮臺之
死詳子文在厯下聞胥叅將之死更詳有自川中得軍
功歸里者略問軍中事彼身在行閒逆匪之戕武弁慘
不可言宜其盪滅無餘也

胡書巢德琳廣西籍江蘇人乾隆壬申進士官四川後
官山東由縣令升東昌知府至副使袁香亭姊丈也工
詩袁簡齋深賞之廷對時擬鼎元因一字失檢被抑遂
與風塵吏伍而才具卓犖所至有聲任濟陽歷城修志
書皆雅贍詳覈未第時屢夢杜少陵韋端已而得蜀之
威遠令震澤沈裕雲送之云交親在何處韋杜夢偏長
謂此也有兩兄雲巢鶴巢

徐士林字式儒號兩峯文登人康熙癸巳進士官刑部
侍直 世宗憲皇帝云爾骨格重異日當爲名臣赴江
蘇布政任僕從三人襍被書籍而已吳俗奢靡公設五

簋脫粟飯宴鄉先生於滄浪亭令郡民縱觀俾知節儉
公私苦累知無不言不避嫌怨素工舉子業勤於課士
作論文詩示諸生窮源溯委備極剴切升江蘇巡撫袁
子才謂繼湯文正公之後一人而已蘇州府志云士林
正直忠厚精明強記歷更大郡更明習法令崇祠賢良
祠安慶江蘇皆入名宦祠子才謂公有母喪有 詔奪
情不起非也公丁外艱服闋起布政以母老力辭不允
官巡撫力請終養卒於途隨園詩話云公詩極綿麗官
中書有句云歸來惹得山妻問侍女薰香近有無按公
官刑曹爲司員于詩非專家有蟬餘集一卷

德州宋蒙泉先生弼以臬使家居極詩酒賓朋之樂續
山左詩鈔載其詩甚多今不盡記先生與曉嵐宗伯善
先生有羅酒歌宗伯和之云平生不飲如東坡銜盃已
覺朱顏酡今日從君論酒味何殊文士談兵戈往昔作
客東光縣春風三月胡蘓河主人好事攜美酒踏青邀
我同相過芳草丰茸疊翡翠幽禽尖咽如鳴梭風景駘
蕩客心暢飲酣起舞爭婆婆爾時意氣亦豪舉呼童一
酌鸚鵡螺伯夷柳下共風調滑流齒頰清而和形神酣
適忘物我便擬倒甕傾滂沱麴生風味真可憶主人云
出陵州羅玉井蓮花釀珠露漁洋當日留詩歌滄州亦

有麻姑酒南川樓下臨盤渦河心泉水清冷味小槽滴
滴浮黃鵝有如少華連太華肩隨未敢爭嵯峨自餘碌
碌千萬種大岡小阜空陂陀東海先生昔好事大徵名
醞分其科章邱墨露推第一品題未免成差訛此事十
年在胸臆回首往日東流波年來倚廬卧昏曉幽憂致
病愁難瘥有疾飲酒禮雖許忍云思此蠲煩疴比似清
簞疎簾句枯禪不免長吟哦偶然一品江瑤柱髯蘇聞
此當云何按查悔餘詩註德州有露酒色如黛漆味比
醍醐曉嵐以爲出章邱未知何據家銀台公每過德州
至羅侍御勤公家必索飲屢見于詩

德州盧抱孫先生康熙六十年進士有吏才總督那祿
圖特薦之有云人短而才長身小而志大在揚州修小
秦淮紅橋二十四景招集名流極一時文酒之盛王蘭
泉稱其愛古好事百餘年來所罕見先生康熙辛丑鄉
舉乾隆戊寅成山左詩鈔去重赴鹿鳴無幾耳留別揚
州故人詩袁子才稱爲絕調出塞詩云解網 綸言下
九閭孤臣猶在識天恩三年便許朝金闕萬里何辭出
玉門沙暗陰山秋獵壯雪明瀚海夏裘溫多情應信揚
州月直送征輪到塞垣

劉石庵相國墉雅不欲以辭章見長王蘭泉謂其詩清

新超詣有香山東坡風格陳子韶合梁山舟書及公書
刻於西湖上名劉梁合璧後日寶重當不亞於球琳

宋蒙泉先生選山左詩皆本朝人又選山左明詩大畧
已具不果刻或慮抱孫先生有他故此事遂輟所集原
本不知猶存否後無能任之者或並不知有此舉爲之
訪求可惜也四叔祖輝吉公諱光符曾將所選吾家中
憲公理丞公僉事公詩一一標出指以示荀四弟薇堂
名培垣嗣輝吉公後錄本藏篋中四弟今歿於川俟余
歸里當檢視蒙泉嘗題吳蓮洋集誰掣鯨魚碧海中玉
溪端是出羣雄臨川獨具千秋眼爲許樊南繼杜公虎

氣龍身豈久藏華陰赤土拭干將當時夜夜豐城色曾
掩星文北斗傍蒲坂遙連太乙山二州八水照孱顏如
何姑射仙人宅只在河聲嶽色間妙解惟應慧業知生
天成佛漫相疑傳鐙消息分明在看取拈花微笑時

歷城李湘浦廷芳由拔貢中乾隆甲寅舉人先令吳江
後知廣東南海有安疏草堂詩鈔秋日過友人村居云
練湖之水乍生波洗眼秋光興若何一桁青山驢背晚
半村紅葉雁聲多關心舊雨經年別屈指佳晨幾度過
正是重陽花事好不辭樽酒共高歌初到姑蘇云山塘
楊柳綠毯毯斟酌橋邊水蔚藍正是清明好時節落花

風裏到江南立秋懷尹竹農王鄰川輕陰漠漠長莓苔
自下簾籠不染埃一葉梧桐秋信到三更風雨夜潮來
退閒便拓栽花地作賦還思倚馬才多少故人天際去
却教海上望蓬萊竹農名濟源官至湖北巡撫鄰川名
允輝官給事中皆歷城人嘉慶年間有匿名揭帖朱某
錄寄鄰川鄰川奏之奉 旨嚴訊不得主名中有劉東
禮潑口大罵語遂疑東禮所爲東禮云身在發審斷案
五百無以意坐罪者乃欲以莫須有坐我乎按乾隆年
間亦有匿名揭帖之案藩司審不出主名幾得罪終以
無可寃詰而止

山陰胡裘錡字寶臣落魄無家來揚求見抱孫先生不
得除夕投詩云莽莽乾坤歲又闌蕭蕭白髮老江干布
金地暖回春易列戟門高再拜難庾信生涯最蕭瑟孟
郊詩骨劇清寒自憐七字香無力封上梅花閣下看先
生見詩即往拜贈銀數笏觀此一端其虛懷可知矣

劉石菴相國奉 旨往壽繼母太夫人於江南太夫人
年屆九十公亦八十二矣太夫人家孫文恭公沁芳以
少宰督學政即石菴先生前爲學使之地母子白首伯
姪繼任家國盛事爲古今希有趙耘菴觀察少年在文
正公門下與石菴先生同學是時家居隨同叩賀作詩

以紀甚爲雅切有云絳騶不遠三千里皓首親捧九十
觴按武兩朝賢宰相疏封一品太夫人韋平有傳難專
美絳灌無文敢媿功又剩誇年少依劉日伴食曾陪兩
相公自註云昔客公家文正師方爲總憲公亦爲孝廉
每日皆三人共飯不另設饌也及送石菴歸云來爲稱
觴增燕喜去歌遵渚羨鴻飛此吾鄉一故實紀之爲後
世佳話

淄令韓公忘其名循吏也其先人明時爲歷城令大兵
破城與巡按宋公死節建雙忠祠沈歸愚遊歷下題詩
云握拳透爪追英風邦人立廟崇雙忠

畢秋帆孫淵如兩先生皆官山左秋帆眷伶人李桂官
得其資助登第人呼狀元夫人淵如嬖伶人郭芍藥爲
作本事詩更有以節義著者國初時青州有歌兒胡文
玉爲無錫黃心甫所昵心甫有僕利其橐中貲夜持刀
斫之文玉以身遮護刃入膚數寸有劉將軍出奇方救
之得不死王昊廬澤宏爲作詩以表之梁溪高士冰雪
姿著書兀兀恆苦饑客遊齊魯何寂寞忽感歌者相追
隨黃河以北嗜北調青州亦住宣州兒妙年顏色天然
美豔妝不學俗女子一夜歌聲遶屋梁滿堂淚下如鉛
水相憐悔不早同生那期只欲從君死先生有僕不安

貧不識博奧之主人拔刀作逆胡爲爾天涯安得金繞
身最恨有刀不鑄眼如花忍作看秋薪虎狼自門入煎
逼何太急短袖甘爲倚柱笑一身却似當熊立少年義
俠誰不憐忍痛無聲暗悲泣此身一死奚足云高義偏
感劉將軍脫贈奇方出金石先生搗藥何殷勤古人深
情各有托繡被安可方紅裙先生自歎知音寡我亦有
生深情者爲僕受恩反負恩如君萍梗交乃肯視死如
飄瓦我願他日乘車相逢揖君下按吳廬與漁洋通譜
交善每呼爲涓來兄吳廬別貽上云鵲鴿影共迴風舞
鴻雁聲愁溼羽翰直以同胞相視矣

寶山毛海客大瀛遊畢秋帆之門後來山左遊國中丞

幕觀其水山一篇似目擊時勢而作作濟南雜詩足資

掌故旅食行蹤那自由蕭然襤被更齊州依人偶寄青

油幕懷古還登白雪樓七子琴樽餘廢壘百年風雅付

寒流歸來靜掩銀缸坐整妮殘書擁敝裘七橋烟月奈

愁何到處尋幽發浩歌每上古城思北海李北海有登

獨驅羸馬憶東坡東坡至濟南有敝裘羸馬古河濱句高賢作守風誰繼

齊南守曾子固後繼起者有是禘之李公擇諸人狂客題詩興尙多七十二泉

無恙在更須一處一經過讀罷齊音倒綠醕王季木有齊音詩一

首濟南先正久飄零萊莊草沒尙書墓邊貢墓在城東萊家莊望

水烟荒閣老亭空向山川餘感慨祇從詞賦想儀型殘
碑斷碣斜陽外枉乞才人筆底靈飄泊平陵客夢賒殘
年踪跡向天涯水從地底分榮沛山向城頭辨鵲華日
上西園朝放鶴烟籠北渚暮歸鴉破窻了得公家事合
與高人伴鬥茶

謂聞人
雪珂

劉文正公節儉素著朝珠無十兩以上者線斷珠落不
復拾出差從二僕所至閉後院不使見一人傳呼卽用
州縣供應家人用馬不過六七匹無過站禮食物不索
珍錯嘗因事籍沒無家貲耕田四驢入官後 命賞還
家產四驢在縣已餓斃縣令買四健驢以償

李長蘅滕縣花開白似銀句漁洋深愛之經過兩次不
見一花有句云不見花開白似銀按長蘅於萬厯丁未
下第與客過滕貰酒觀花作是詩至漁洋則滄桑已更
舊景渺然然滕縣花木昔實繁盛觀與長蘅共飲之客
後十四年復經其地追感舊遊一詩足徵其概詩云滕
縣春來花萬樹花白花紅夾煙霧交加嫩蘂欺豔陽灼
爍繁英照日暮今我來時秋已老柳禿槐黃隕霜露風
雨依稀下第身鶯花指點停車路與君過此十四春日
月如梭事錯互青春作伴更幾迴紫陌看花是前度花
開花落下成谿征人合沓從此去花前掉臂去復來縱

見花開有何趣羨君眞作淡蕩人閒則牽舟湖上住山
僧扣門分盤飧榜人刺舟乞絹素西湖煙水收綠波靈
隱霜林放紅雨征途茫茫君倘憶清夢悠悠我難赴推
尋舊跡如見君花白如銀詠君句沈吟感嘆日欲西爲
君酌酒田文墓

歷城朱琦號箕谷工詩爲四川安岳令宿國清寺偶興
云繡斧當年駐岳陽題詩曾向贊公房殘碑已逐恆河
劫遺韻猶畱梵宇光鳥織楞伽元解語花非簷蔔更無
香從茲好事參寥子不羨山門玉帶長猶有一首不具
錄

漁洋平生好寫圖門人查初白慎行題倚杖圖云誰與
先生貌一邱柴門以外卽滄洲殘霞紅上鯉魚尾遠水
碧于雄鴨頭風定垂垂綠楊影雨餘咽咽涼蟬秋幾時
眞裏幅巾去容我來隨杖履遊漁洋最愛蠶尾山以名
其集後繪爲圖題之云依然小泊洞庭旁公自扁州興
不忘試向東山看月出繞身三十里湖光勿論石室與
金庭畫裏迴源別有亭七十二峰遮不斷又添蠶尾一
痕青杜詩細雨荷鋤立哀猿吟翠屏漁洋甚愛之後倩
禹之鼎繪荷鋤圖小照查題詩中有云齊州九點青模
糊萬木陰陰猿鳥呼春山欲雨雲作膚風帆亂走隨鷗

見村深岸轉帶渚蒲綠楊如烟際平蕪中有一翁行荷鋤師弟相契甚深亦足見漁洋生平寫圖之多而身後散遺爲可惜也

趙秋谷以事罷官牽引多名流查初白其一也初白云飲酒得罪古亦有之好事生風旁加指斥意雖不在蘇子美子美亦不免焉送秋谷歸里云竿木逢場一笑成酒徒作計太憨生荆高市上重相見搖手休呼舊姓名南北分飛悵各天輸他先我著歸鞭欲逃世網無多語莫遣詩名萬口傳後初白爲有力者吹噓而秋谷終身落拓

諸城劉太傅延清生平不佞佛然於大乘方廣諸經皆
能得其指要六旬以後夜間跏趺危坐至二三更臨終
之日五更起盥嗽飲食如常升輿至東華門輿微側家
人呼之已瞑 上親臨見門外蕭條室無長物深爲痛
悼賜諡文正不待議也石菴先生以公勲業在國史不
撰行狀不乞人作墓碑及誌銘第取所奉 諭旨及奏
疏編錄以示子孫從前格套一洗而空真卓見也太傅
有平定金川詩典瞻壯麗匹美江漢石菴先生贈日者
云人間富貴誰偏有天上星辰爾詎知贈相者云媿我
支離形似鶴笑渠落拓酒無錢嘲弄見其高曠

蕪湖韋約軒謙恆乾隆二十八年探花也來爲山東學使崇尙風雅嘗作古廳亭賦以示學人在京師得其詩集四冊和平溫雅肖乎其人吟興至老不倦尤嗜易有秋林講易圖自序云濟南使院在大明湖東水石清幽致有佳趣新秋雨霽校士餘閒偕兒子協夢協中學易於坳芥堂因爲圖題五言平生嗜墳典一編每獨把矧以退食餘坐我秋樹下清光盈胸懷水木自瀟灑蓬髮有二子詩書爲陶冶易學傳九世詎敢頓喑啞程邵吾兼師焦京汝姑舍居則玩其辭鳴鶴象可假惟期樞機慎庶幾悔吝寡安能病包犧效彼負苓者

王父小山公結客好遊渡黃河遊洛下歷揚州入金陵
涉八閩三載而歸所居舊名南園宅東老槐數株綠幄
沉沉西則雜植桑棗棗爲海州公自南土移來異種後
爲居室中闢書舍庭前梅杏桃李甚夥丁香海棠尤巨
雜以紫荊迎春牡丹春時花開如錦旦夕與客談讌或
風清月白輒吹笛以暢幽懷晚歲約族中子姪及戚友
英俊爲文會爲之月旦席間首唱一詩箋字韻和者皆
不能及稿惜失去僅記結句最是吾鄉當自愧書香不
振百餘年歿後風流歇絕庭中花木皆殘屈指會中雕
零已盡惟韓百木樹柏猶在年近古稀矣百木少受業

于先嚴與荀共筆硯英才卓犖深爲帥仙舟載可亭兩
先生賞識竟以歲貢就學博追憶曩時周旋杖履共以
筆墨馳騁於今白首五千里外雲樹渺然文社在雙塔
寺踞高崖臨流水去余家僅二里

山中有客以芝饋王父三十餘本紅黃碧綠五色爛然
其質稿而不腐可供几席雅玩倘在宋真宗明世宗時
必貢入闕庭覲厚賜矣鄰村有得紫芝者四弟薇堂借
來觀之紫光如漆不栽濕土數日亭亭如故隱士采紫
芝服之學仙未知如何餐法昔東坡居士得肉芝如小
兒掌書云服肉芝者不死東坡與子由服之無驗

劉金門夫子視學山東愛才如命喜與諸生論文辛酉
擬程極高簡而未見其詩嘗題陶雲汀澍蜀輶日記五
律雖屬酬應之作第在先生一鱗片甲皆可寶貴蜀國
好詩境翰林今大家高風邈彭澤名士屹長沙弟子占
星喜山川晝日賒知君不徒作發軔此皇華萬古才無
盡那如天與情卽從官一集略紀使千程劒外魚鳬遠
江頭驄馬行長吟紆國計又播廣陵城

水經注言臨淄城內有邱週迴三百步高九丈爲營邱
而營邱故城在昌樂東南五十里爲太公始封獻公始
遷臨淄何以臨淄又有營邱按太公本東海人今有東

呂村釣于棘津棘津在海曲通典海曲故城在莒縣以爲汲人者非臨淄十里內外多大家小者二三丈大者連岡帶阜獨田氏四王冢在南山之下巍然大莫與京土人云皆已發掘獨晏嬰墓屢有神怪不可開城內有明衡王花塢紫薇千樹蘭菊成畦國初猶存未幾委之蔓草矣臨朐有園林木皆栗梨楂杏朱氏世守之

濰縣科第甚盛文廟有文官果一株結子幾枚鄉試中如其數無不驗一歲結實甚多數之得十三枚眾以爲恐未必符旣揭曉中人雖多尙未滿其數俄北榜報至連副榜果十三名異矣

濟寧州牧藍應桂之婿潘鷺杭光晉俱於乾隆四十二年會試中式光晉恃才而傲以岳翁之力冒山東商籍入學歲科試輒冠軍文宗深賞其文諸生閱卷時或從旁竊視光晉目之曰君安識吾文中山東舉人雖有知其事者以藍方得巡撫國泰寵眷不敢發及是復捷禮閣光晉原籍浙江謁同鄉官同鄉稱賀光晉大言曰此何足道吾浙牽一狗來山東亦可中進士是時山東人爲給事中者先在避客內室聞其語忿甚據實奏潘杭二人俱斥革藍應桂發往軍台潘鷺之父潘汝誠先任濮州牧告歸亦革職

前任嶧縣令張若谷長子敕次子敵亦於父任內冒商籍中式爲山東舉人敕任江西萍鄉知縣敵任湖北房縣知縣乾隆四十四年亦以冒籍革職敵號雪鴻名士風流但高抗不媚權貴罷官復遊山東人多愛其畫余見其手筆最多其杏林春宴圖燕子飛鳴如生家蓄玉瓶高四五寸有玉索滿其中掣之甚長一端連瓶底一端繫瓶蓋不知其何以雕刻也疑爲鬼工

雪鴻孫惠從學先君

蜀中張船山墨迹多僞者守萊州罷郡日求書者踵至留於東者反過西蜀有詩云秋蛇春蚓太綢繆官吏鄉民次第求四海墨花飛不盡又留千紙在萊州

德州盧侍御德水名世淮平生嗜杜詩園中作杜亭祀
少陵每歲元旦必拜祭讀杜詩作大凡作餘論又有胥
鈔分體寓編年以利觀覽不着論斷存真面使學者自
尋微有去畱以志心賞作讀杜微吟總括工部生平以
當佳傳又請錢某作箋漁洋論詩絕句云杜家箋傳太
紛挐虞趙諸賢盡守株苦爲南華求向郭前推山谷後
錢盧翁覃溪用筆抹錢字嫌其多穿鑿也按漁洋手批
杜詩卽據錢本杜詩各本字有不同錢註一作某一作
某漁洋於其善者圈出有益後學

漁洋得磨崖碑汪蛟門作詩漁洋稱之以示秋谷覽其

起句云楊家姊妹顏妖狐抵於地曰咏中興而推原致
亂之由雖百韻可矣尙作爾語耶後之論者謂起句實
不佳以後瑰瑋雄麗不愧傑作吾淄張崑崙先生所作
尤爲漁洋賞識中有云煌煌魯公鼎彝氣大書深刻神
爲謀屢屢參天數千仞湘江萬古東西流吉甫作頌史
籀筆力撫石鼓追成周又云莊如王會輯萬玉飄紳楮
珽朝羣侯雄如將軍建大旆長戈列戟森兜鍪奇偉丈
夫古冠劍乾坤大筆來神樓漁洋評云此篇略敘元頌
以下皆發揮顏書奇偉與題相副又云諸家多爭肅宗
功罪此獨擺脫如先生詩可免秋谷之詆呵矣

父子兩世爲濟南太守者仁和蔡崧霞先生應彪乾隆
丁巳進士所刻制義才宏肆而法律精嚴人膾炙人口
吏治尤著宰鉅野時有孝廉繼室與惡僕通爲同伴窺
知懼發其奸誘之途致死滅口按問時惡僕牽及主母
公置不問以他事置惡僕以謀死罪守沂州時沂水縣
鹽梟聚眾滋事緝獲多人擇首從分別置法其被脅入
夥者悉從輕典所活無算蘭山郟城多窪田公開河道
七十餘處窪地盡成膏腴嘗云作官三十餘年家無半
隴惟有清白以貽子孫每寓家書訓迪綦篤後官至布
政子廷衡乾隆戊戌榜眼亦守濟南後官甘肅布政孫

振武號譽洲道光丙申會魁由翰林轉御史甲辰督學四川元孫念慈辛丑會元丙午福建主考皆一人陰德之所貽也

某販馬遇客形狀憔悴問之云在雲南攻銅礦折本慨然贈廿金客歸理舊業山開礦露擁金鉅萬與販馬者復遇感激良深問所欲某云欲爲官贈數千金使入京營謀某在都酒樓妓館揮洒罄盡客以事至京見之訝其落漠復爲捐縣丞分發山東補缺後一日不知所往乃身推獨輪車至登萊閒獲巨盜升知縣後擢知府惜傳者忘其姓名恢闊豪宕洵奇人哉

蔣大令伯生名因培從父官山東流寓齊魯伯生後亦
官山東爲縣令詩才敏捷狂放不羈當事者惡之就其
詩句加註以爲語涉譏諷文致周內登之白簡 睿皇
帝察其無他 特恩寬宥復官伯生感激有詩記之僅
記又荷丹毫點註來餘盡忘矣爲齊河令罷歸郝答送
以詩云楚水吳峯道路遙拂衣歸去宦情消一官未可
容強項五斗何能更折腰大邑雙鳬何足戀小山叢桂
正相邀知君囊底無他物惟有清風兩袖飄

宋湘臯藻廉訪蒙泉先生次子也詩有家傳一時詞壇
推爲老宿性兀傲於人少許可善指摘詩文瑕疵以是

不諧于時懷才貧困以歿齊河郝秋岩女史及弟君實
皆從學詩歿後君實哭以詩云傲兀羣推不世情閉門
窮巷少逢迎家傳弓冶詩篇富身歷飢寒感慨并白髮
幾人稱弟子青山老我哭先生如何一慟山陽笛庾信
空傳思舊銘

吾邑蒼龍峽兩峯夾峙山不高而蒼秀狹處不容車馬
過峽一灣流水數株桃花別一世界如桃源也郝允秀
詩云攬勝春山路不迷纓腰乍到板橋西連天樹色浮
晴野滿目峯光接碧溪茅屋幾村花欲折東風一路鳥
爭啼行行忽覺林巒別流水聲中問小僊

戴已山刺史軀短小精明過人以進士分發山東爲縣
令調繁歷城陞濱州牧繼牧膠州濰縣教匪馬綱滋事
郅誤罷職非其罪也先生工於詞詩筆亦秀而懼內過
謝太傅無子不敢置姬妾眷一妓訂終身以夫人故忍
置之嘗作秋海棠步漁洋秋柳原韻夕陽無語鎖銷魂
泣泣疎紅冷到門顧影自憐秋一剪斷腸人遠淚雙痕
眞成薄命偏傾國生小含顰合住村若共春華競顏色
等閒嬌姹恐難論玉宇初澄夜未霜幾拳瘦石襯林塘
洗妝露冷紅低檻捲地雲多翠疊箱本自無詩翻說杜
幾曾工畫敢嗤王丰姿絕代情懷遠珍惜何人護錦坊

娟娟明月照苔衣夢裡華清覺後非有恨但聞蛩語悄
無香焉怪蝶痕稀種愁隔世闌干續漬粉成茵熠熠飛
等是貯嬌金屋渺感恩偏與素心違弱不禁愁瘦可憐
捲簾人佇一庭烟西風別院涼深淺疎雨空階夜邈綿
正好秋光宜冷豔恰看花樣憶韶年牆陰多少葵心赤
小草何因到日邊

同年姚以臨莊持歷城人都會之區多風流自喜以臨
性情端方偕朋好過妓門強挽以入堅不肯門外佇立
以待其出而接物和雅絕非迂僻固執一流爲河南偃
師令甲辰入闈分校得疾去冬卒記之以存梗概

詩忌書多埋沒性靈若用典確切而有風韻則妙矣吾東有候補佐貳官何姓戲咏鼠娶婦云相體亦如人有禮于歸誰謂汝無家有許姓欲就蔣伯生館時蔣署滕縣因寄詩云君真好客開三徑我願爲氓受一廛俱極切而工妙

吾淄翟笠山灝臨古人筆迹無不逼肖唐太宗虞世南等直行摹刻於石如見古揭時人稱爲絕技不虛也嘗見其書孫過庭書譜十二幅如驚蛇入戶筆勢飛舞官臺灣回言玉山在生蕃外望之嶙峋如雪皆白玉堆積非若和闐之藏於石也有惡溪毒蟲人不敢近又言海

中有巨珊瑚三四人合抱近處映水盡赤龍宮在其下
舟行避之笠山有詩集未刻

邑人軒轅誥以舉人作教諭將陞某府教授中已未會
元殿試改庶常散館歸班選改教授仍選其初陞之缺
一片青氈依然如舊二十年如一夢云

吾邑譚眉樵先生因其村旁有小峨眉山故以自號學
老文鉅屢困場屋齒已壯矣憤極欲自縊懸繩聞空中
語曰頭小驚視無人復引頸向繩又呼曰頭尙小未解
何故遂止又數年捷鄉闈解元年甚少方知待其人也
科各有定如此

諸城竇總憲光鼐在翰林大考第一不二年至內閣學士以文受知性伉直敢言任浙江學使發平陽重徵之案審實縣令得罪浙人士踴躍感泣門人秦君瀛置木主於西湖望湖樓且刻先生詩集登九蓮山云蓮山東南豁百里俯滄洲陽崖叢石蓮陰壑蟠潛蚪堯朶造白曰山絕頂名八朶峯羲和礙行輶萬壽冠羣峰石色連天浮覽古憶漢士問年齊浮邱往往傳丹液可遇不可求想像明月夜鸞鶴騁遨遊銀臺光照耀倒景隨東流浩歌遏白雲清絕令人愁鸞鳩捨榆枋黃鵠固遠投涼颺振林樹柯葉如驚秋夙心展廣眺及茲縱冥搜言陟從壽嶺

佇望仙橋路

有陸仙橋

積石淙清流斜陽亂紅樹賞心會獨

徃倦足容小住頽宇龍象愁危巖獅虎怒

山有獅象峯虎岩峯

人逼蓬萊溟漲不可渡溯洄溪風長寒林颯已暮杳杳

遠鴻音鬱鬱隱豹霧撫化時有適得已物無忤揮手攬

皓魄振衣拂白露行行謝磷緇終然完吾素游天井名一

白龍潭

游子追險絕造物秘靈境始下九仙麓檻泉書庫

峰頂西行得牛泚幽尋問天井杖策半缺折谿徑猶榛

梗跼身緣峻嶒步澀覺道永稍出石門隘已怖風色猛

湍瀑迴羣壑硤角會諸嶺仰睇練峰高轉睨龍塔迴勢

挾河漢落氣侵毛髮冷黑雲閉靈竇白日匿晶影俯崖

窺牛壁陰鑑洞內景想見虛無底積水藏溟滓有時沃
驕陽霖雨應禱請沉牲終不受澹灝涵淵靜適來驚蟄
潛殷雷晨一警豈謂感鬼神茲游固多幸西輝餘照曜
延佇惜俄頃

益都李南澗文藻窮經好古肆力於漢唐註疏嘗與周
林汲先生取經史著述之未甚傳世者刻爲貸園叢書
未竟而卒林汲先生一號書倉以七品官奉 旨國史
立傳異數也南澗績學爲縣令陞州牧賁恨以歿所遇
有幸有不幸焉遊觀音巖云曉至觀音巖艤舟試屣腳
洞門呀然闢攝衣闖重鑰白日忽昏夜明燈僅微燭拊

楯山鼠飛唾地谷神諾屢折迷所向踏石畏朽索一竅
開絕頂俯瞰得寥廓奔瀧圍佛几來朝萬青嶠形肖靡
不有獅象龍鳳鶴鍾乳當檐垂旛蓋倒蓮萼輪囷寫毫
光珠玉飾簾幕造物施供養萬古無銷鑠耄衲導我下
具茗半山閣軒豁遊大厦息定興磅礴拂蘚睇高壁文
字爭寄託韓蘇所未到此景遂寂寞再下出洞口乃見
飴山作南遊爲美莊川巘入詩橐磨勒得此三南山連
碧落恂悅新城篇片石誰爲鑿回舟更仰首萬仞一斧
削皴縞尺寸異渲染朱綠錯五丁猶夙聞何人布丹雘
下有蛟螭蟠上絕猿猱躩松桂挂石棱飛鳥偶附著對

此一長嘯迢然滿崖壑卻悔初來時峭帆疾于鶚夜夜
蓬島夢年年文書縛山英留奇勝及歸踐昔約烟霞浮
蓬窗兒女亦駭愕行厨問薪米將爲十日泊

邱縣劉松嵐大觀詩刻峭清蒼有玉磬山房詩鈔與郡
人芳山種花云勵雲植嘉卉聊復助天工此土非吾有
分春與衆同暮烟生遠水樵唱散遙空領得山中趣橫
琴坐晚風東昌舟次寄兄云節次幾更移多年嗟遠離
最難遣愁處將欲到家時問友多新墓看花少故枝祇
餘江上月猶爲照深卮貧士云寒鷄窮巷鳴不見笑烟
生書向鄰家借詩多雪夜成斷繩橫短榻折足臥空鐙

盡日無人到時聞飢鼠聲刻苦絕似賈島生平嗜高密
二李詩故取法如此

董曲江元度改庶常後乞假南遊來往姑蘇維揚閒寓
廬雅雨署中最久題廬雅雨先生平山高會圖云好憑
高處豁雙眸載酒頻來作勝游地脉遠從全蜀至山光
坐向大江收銜恩轉運重持節遲客登臨獨倚樓一
自治春文讌後代興畢竟屬齊州天涯倦客病維摩仙
侶聯舟一再過饒有烟霞隨杖履不妨山水當笙歌梅
分官閣寒香早月傍揚州夜色多好事屏風傳嬰鑑使
君鬢髮未全皤

曲江晚主保定蓮池書院偃蹇以殺詩多感慨

嘗疑李長吉升天作白玉樓記必佳惜也人不得見秋
谷先生以詩名歿時年及髦矣後寶山有徐水鄉名松
者少有才藻忽病語其父曰兒將往謁洞庭陰君祈以
詩稿付友浦翔春其時浦猶未知其死夢水鄉來談自
云今遊趙秋谷門下講詩工夫大進然則秋谷之靈固
未嘗氓也聚古今才人于地下天上其樂當勝人閒十
倍

厯下曾南村受業吾邑張榆村先生先生深於時文而
詩學亦醇南村得其指授夙耽吟咏牧山西平定州以
所厯上黨咏古諸作命門人李珍聘書之藏文昌祠中

仿白香山分置詩集於聖善東林兩寺故事也歿後十
餘年陶悔軒復莅其地見詩愛其清妙又喜爲同鄉乃
序而刻之并附已作兩公此事不徒爲平定添一公案
亦吾鄉佳話也南村盤石關云盤石關前石路微離離
黃葉小村稀斜陽忽送青峯影千疊層雲屋上飛悔軒
詩云一代文章擅逸才開軒吟罷興悠哉官閒且喜能
醫俗爲與詩人坐臥來其風流可想矣

厯城朱青雷文震精篆隸工畫又善雕圖章嘗宿隨園
爲袁子才鐫小印二十餘方其神速眾莫逮也紅橋晚
步云西風開遍野棠花垂柳絲絲數點鴉多少畫船歸

欲盡夕陽猶戀玉鉤斜過揚子江云笑對篷窗酒一罍
黃梅時節恰揚舫憑君說盡風波惡貪看金焦漫不應
青雷與鄭板橋善板橋在揚州爲八人會在座者程綿
莊黃瘦瓢王夢樓金樸亭于石鄉張仲謀板橋畫蘭八
葉以符人數誤多一撇笑曰今日豈有後來者乎午後
青雷不期而至鄭大喜乃畫九畹蘭以紀其盛作詩云
何須芍藥誇金帶自是千秋九畹青

濰縣令鄭板橋燮滕縣令李復堂鐔二君皆興化人皆
工畫又同官山東最相得雅雨先生自揚州寄板橋詩
云一代清華盛事饒冶春高宴各分鑣風流暫顯烟花

在又見詩人鄭板橋板橋得錢輒分與親戚故舊告歸
囊空無立錫地寄居復堂之宅贈李詩有云聲色荒淫
二十年丹青縱橫三千里兩嬰世網破其家黃金散盡
妻孥悲剝啄催租惱吏頻水田千畝翻爲累途窮賣畫
畫益賤傭兒買豎論非是昨畫雙松半未成醉來怒裂
澄心紙將復堂情態寫得鬚眉俱動二君筆迹流傳山
東最多鄭師徐青藤縱橫恣肆任其天趣而不離法李
師蔣南沙相公疎秀中帶細緻亦淡著色可稱異曲同
工余得板橋所作濰縣城隍廟碑在板橋爲楷書而偏
側處姿態橫生足見名士風流

平原劉觀察松嵐同邑張雨田之姑丈也雨田在川候
補案頭有觀察娛老集吾邑馮荻橋大令爲之跋觀察
好詩喜事新城王子文祖昌攜詩謁之卽爲刻其全集
初官粵西十餘年苦不可言自謂宰天保三年最樂邑
去桂林二千里乾隆初年始置縣其地如鴻荒初闢食
無珍錯衣無文繡人無袴蒲無乞丐娼優亦無盜賊月
收訟牒一二紙胥吏早供役午歸薪米雞豚皆父老兒
童背負以來歲得養廉八百金宦場無絲毫應酬大吏
皆度外置之也吾東詩人益都李詞晚高密李少鶴及
松嵐皆以詩名皆官粵西奇矣

前記趙文毅兇航在曲阜顏衡齋處公五世孫者庭名
王槐製玉航銀船託翁覃溪宮詹介之以文易歸覃溪
題以詩亦甚警末云顏公奉航向君笑趙叟傾心誓相
報航喜多年逢故人叟泣還鄉告家廟昔人贈航事偶
然今日還航事更傳譜出兇航新樂府壓倒米家虹玉

船

後者庭
宰淄川

予少時見人佳詩每鈔錄屈悔翁書中乾蝴蝶詩二十
首有句云從來花海皆文海第一香山是西山以爲小
題有如此沉雄瑰麗之詞非老於騷壇者莫辦遂盡錄
之屈當時傲岸自負刪改少陵詆訾李太白出必高杖

四童扶持以自表異見客南面坐王侯拜榻下曲阜顏
懋僑詰之曰足下有書中乾蝴蝶詩此委巷小家子題
目李杜集中曾有此否屈不能應觀此余乃愧所見之
淺也

聊城傳鄧二狀元共一巷鄧悔廬先生名鍾岳康熙辛
丑及第博洽工書求無不應見其長卷楷書清挺秀逸
如珠光照人一督江南學政兩主江南鄉試爲學院時
按試揚州一史姓童年三十餘視其三代則祖名可法
公驚疑問同試相識者皆云非妄蓋公有妾在揚生遺
腹子及閱卷文理欠通公語眾曰此忠臣後不可以文

論取之雖私亦公更詳序原委刻石嵌試院壁公此舉
快人心而維風化可感也公與雅雨同年官侍郎學問
德望甚著不以詩名而詩極可誦東園柳枝詞云林影
參差遠障空雲廊畫閣有無中清明十日春光好綠染
垂楊第幾重樹頭新月細如鉤樹底村烟翠欲流堪笑
踏青人草草和烟和月上漁舟按公雍正年間爲學使
史公之孫入泮以的派自當奉祠乃乾隆十年乙丑有
閣部孫纂曾孫山清元孫開純致祭皆自云德威之後
是揚州副將閣部以爲嗣者鄧公所取竟無聞焉何耶

錄之以俟博識

特心餘得史公遺
錄開純纂以奉祀

海豐吳樹堂垣在部曹時因太監漏言一案干連被議
後官湖北巡撫里居聞縣令鳴鑼過在室起立家人問
故曰父母官過安得不敬性尤愛才綿竹李雨村在京
候補有文名引之見諸城劉文正公公薨囑雨村爲祭
文有人憚王陵之顛天憐汲黯之忠深喜其切公性情
雨村以小故失官吳爲不平及奉 特恩開復乃招飲
賞菊于椿樹衢衢之我堂舉杯屬曰今日必有好詩李
卽席賦云羣賢畢集我堂東四面圖書映畫櫳九月天
逢楓葉雨一時人醉菊花風是雨村於哀清慙外又得
一知己也海豐吳氏爲望族一時有三巡撫餘多列仕

籍今名式敏式羣式穀者皆少年登科第方興未已

沈歸愚袁子才俱乾隆戊午己未聯捷進士是時益都

趙秋谷先生尙健在秋谷康熙戊午舉人已未進士與

新舉人會先後同年沈歸愚贈以詩云後先己未亦同

年歸愚猶接漁洋秋谷之芳徽其負海內盛名不虛

本朝以五經中式者甚多而開其始者則吾東膠州法

黃石先生若真也順治乙酉鄉試作五經文監臨主司

公薦異才 詔試玉芝宮 賜內閣中書一體會試丙

戌成進士入詞館

乾隆辛酉中法坤宏

解元安邱劉其旋劉君工

於時藝元文如初寫黃庭到恰好處坤宏則雄奇磊落

積掃一切皆名士也劉亦成進士坤宏卽黃石之裔黃石官布政告歸以書畫自娛乾隆庚午趙崧崧亦以五經中式明年會試禁止不准作五經文後因以經分房或過多或太少不均五經各出一題崧崧謂石黃于丁酉鄉試安得丙戌成進士似字誤

濟陽艾大司寇元徵在京所居園有梨甘踰常品大學士李公蔚過其寓食之美司寇每當梨熟輒摘以饋其後園歸徐總漕旭齡又爲給諫趙恆夫吉士所有皆饋如故幾三十年矣康熙癸亥梨結實倍前甲子李公薨梨遂枯一梨與相公終始事亦可異

德州盧南石參政蔭溥嘉慶庚辰會試總裁眾考官共賞山東一卷謂可冠多士盧公曰吾爲主考而以山東人作元母乃私乎遂別取一卷謂得題解而以山東卷次之及填榜亞元乃安邱劉公耀椿會元則廣西陳公繼昌也陳鄉試第一殿試復第一爲三元蓮史爲榕門先生後先生理學名臣宜昌其後冥冥中固早定矣明時得三元者爲商輅黃觀 本朝乾隆閒蘇州錢湘舲槩己亥解元辛丑會狀陳公繼之已有兩人陳現任布政劉壯年以道憲升四川按察使因前海疆失事爲人劾罷未至川

吾邑高念東題周公廟云弟兄王業岐豐後父子文章
河洛餘典切高華不可移易膠州李霞裳世錫咏甘草
云厯事五朝長樂老未曾獨將韓留侯二事與甘草無
涉用來恰切奇矣厯城周二南樂咏淮陰侯云帝或有
謀商呂雉公原無語到陳稀語新意刻亦前人所未有
也

東昌北關壁上有咏錢串詩云出身原自漚麻地一到
人間萬事宜莫怪無端便拋卻多因不是有錢時意太
淺露非雅音也又有句云牀頭內子矜藏酒被底兒童
賭念詩情真語妙宜爲過客所賞

隨園詩話云盧抱孫與馬墨麟未第時出孫子未先生門按抱孫康熙辛丑登第始謁子未先生意殊落落及見其與馬唱和詩大欣賞乃過寓索飲遂訂交何云早出門下耶馬歿抱孫哭之云前輩典型亡北斗中原旗鼓失南軍

登岱詩自謝靈運始靈運遊山詩無不佳惟此詩仇滄柱云上半古秀下卻平淺蓋非巨刃摩天手未易稱題也工部望嶽一篇遂使前賢畏後生應劭漢官儀形容山之高大用筆古寫景奇爲遊山記開山之祖惜後來無能措筆

余在歷下有句云湖澄僧眼碧山擁佛頭青已隔三十年全篇久忘矣今歲周幾東子寶文來榮行篋中有李南澗詩草聖壽寺云涇將僧眼碧山落佛頭青何句法之相同也

余家有張錦芳小楷書心經墨刻錦芳號葑齋廣東順德解元與先君同在直隸文安周肅齋先生署卽當時所贈葑齋名下士與兄葑房以詩著周肅齋李南澗皆與交善南澗自記云自羊城解纜張毓東葑房兄弟及黎二樵黃銘室相送佛山鎮舟中彈琴圍碁作畫賦詩次日過沙口始別留詩以贈與葑房訂此後月通一札

必附新詩其遲速浮沉聽之葯齋記云三月三日得南
澗先生保昌見寄詩因以二樵所畫公像褻于首而係
以詩有云屈指數郵籤已度滕王閣書來詩滿卷猶是
嶺南作末云賤子別公久美疢失良藥一憶文酒歡詎
禁數日惡錄此見昔人交情風流佳話爲可傳也

張廷光去余家數里園有白牡丹甚高出簷際花面盈
尺東坡所稱玉盤盂者不足多也有客乘黑騾甚健見
花愛甚欲以騾易不可花竟枯越二年枯腹中忽挺怒
芽粗如臂亭亭直上開花三朶此客又乘黑驢過願易
驢外贈錢二百千主不顧客去花謝遂稿不復生

臨清閘官何士錫見上流漂一棺棺上伏小兒急出錢募役救小兒曳棺上岸又撈得女屍一男屍三卽爲藁葬生者賃屋居之越兩月有監生徐均至言其尊人宰邢臺卒于任眷口先扶柩回一女其妹餘者爲僕棺上兒方四歲其子也乾隆三十七年事洪稚存親聞徐均自言作詩云臨清閘閘置官閘官閉閘方一日忽見天上來浮棺浮棺誰舊令尹急溜失風船沒板一女數奴魂不返漆棺浮處沉四屍棺頂乃復憑嬰兒漕船戕戕下水來大聲呼閘閘不開閘不開衆皆詈閘官倉皇掉其臂三百閘夫聲若沸曳棺出水兒亦蘓魚腹奪出雙

亡奴結云君不見何閭官救人出死爲送喪淚尙垂棺側竟與棺中不相識

道光十七年六月夜大雨淄川西關外河水陡高數丈

門外石牛漂去數里崩雉堞壞廬舍余有詩云般陽百

雉砢崇墉石橋新築

戊子修

亘長虹夜半忽聞蛟龍吼雨

飛雷擊挾狂風有如項羽百萬卒排突誰敢當其衝大

海騰波鯨魚立傾翻貝闕倒龍宮石牛橫卧鎮水怪頃

刻漂沒難尋踪婦號兒啼驚倉卒兩岸焜耀燈火紅

居民

見兩岸燈明蛟龍目睛也水面露首

鬼神遷移避阨劫

似牛羊者無數數百年未有之異

居民有夢神令其同遷吁嗟怪事驚老翁

錄不具錄

沈歸愚年少時其師嘗以已詩古文並及門數人詩寄
漁洋先生先生答書許以特立成家謂歸愚等不但得
皮得骨直已得髓故歸愚終身佩服漁洋分甘餘話謂
戊子解元李紱二三場博大精深有萬夫之稟李巨來
聞之深感知已屢欲謁見不果辛卯還朝直趨山東訪
里居則先生已撤瑟矣戚然涕出作輓詩云維昔徂徠
翁賦詩推歐豪遼哉南北海響應如雷執古調知音難
頌洞驚海濤鍾期一以往絃絕絲桐韻 清時有名丑
弼教參夔咎積學富墳典餘事窮風騷讀書固已勤猶
傳吐握勞雜遝門下賢不數籍湜躬當年競文戰髣髴

臯蘭鑒藐余起孤生狂簡譏琴牢固陋怯趨附俯仰輸
枯槁苑枯勢所絕長松謝青蒿風簷五經藝拙速慚枚
臯蔡邕獨歎顧范逵驟譽陶資許萬夫稟榮逾一字褒
小大豈易位泰山齊秋毫有言無不酬詩稱瓊瑤桃逝
將望清光一謝平生遭忽聞墓草宿無由薦溪毛東斷
六鼇足西傾崑崙尻龍亡虎旣逝鯢舞狐貍號千秋不
可作勞心空惻惻漁洋盛時其願附青雲者不勝數獨
二公于身後因一言畢生不忘前輩愛才之誠與知己
之感爲何如耶若後來或以爲漁洋才力薄或以爲婉
約有餘興會不足則未免爭名之見耳

新秋水章邱人善丹青來吾邑學博高公署是時高公
子西園年方童稚亦學畫同榻臥起最从晚年重逢西
園追感舊遊置酒與飲作長歌贈之云荒村落日風蕭
騷隔離人語聞嘈嘈蒼茫起立問誰者濟南故人鬢山
樵此指長白鬢堂
嶺非淄之鬢山鬢山樵客丹青手半生老筆驅山走
有時得酒氣尤豪一潑尋常墨數斗形容秋水之畫竝
其意氣寫出西園在濟南漁洋先生病遺囑命往新城
拜畫像受賜書時康熙辛卯也西園遂稱私淑門人元
旦懸畫像拜祭見繞屋梅花有欲放者悵然作詩云半
生畫裏見羹牆今夕鑪添柏子香萬頃梅花香雪海定

知烟水夢漁洋西園性情豪邁而平生篤於師友如此

盧雅雨守潁州濬西湖清出湖岸餘地撥四百畝給歐陽文忠後人以奉祠祭其餘收租以備修堤之用賢者舉動異於俗吏如此後來加賦漸爲民累諸城王斂福字清範雅雨同年也繼守是邦親勘復其原額又開濬清河以疏水患兩公德澤至今潁人思之按盧王交最契王贈雅雨詩有云紛紛詞賦陪雕輦誰似凌雲漢長卿盧和云一笑雲泥迴世情誰從偃蹇重狂生花當開罷猶呼醉馬到門前總不行祕府藏書頻借看天家賜祿亦分榮清時倘問流傳賦尙有鄉人識長卿

林汲先生讀書佛峪沉酣古籍自云不善作時下闡墨
顧鄉會皆中魁選鄉墨孟公綽一節題文尤古雅絕倫
三場多靠策料作活計先生提筆直書腹笥傾瀉不盡
余見鄉會策原原本本主司擊賞俱進 呈子震甲字

東木乾隆庚子北闈出場錄稿呈先生怒其倆先正矩
蕪揭曉竟中魁蓋以偏師制勝也先生與先大父往還
手迹最多獨未見其詩東木詩能承家學送古愚陸二
歸江南覲省清時不負老萊衣回首田園足是非愧我
中年營旅食羨君計日覲慈闈蘋花江上風初冷蘆葉
洲前雁正飛鄭重倚門相望意好將寸草報春暉奉和

趙二年丈自伊犁歸里懷舊妓蘭素原韻成客歸從弱
水濱多情杜牧又尋春猶餘鸚鵡杯中酒無復蝦蟆嶺
下人一曲風中畱孽果再生天上是前因寒回萬里雪
山路迢遞重城烟火新再疊原韻送趙二年丈北游玉
螺峯下鏡湖濱花拂低檐柳拂春霧樹青帘寒貰酒畫
欄紅袖夜畱人風含易水添愁思日抱燕山結夢因寂
寂黃金臺畔路暫開烟草一痕新孤蹤曾屆苦寒濱白
草黃雲不見春萬里鶯花迎遠客廿年詩酒屬何人嘗
來沙界三千數脫盡雲羅十二因大海茫茫天澹澹海
天空闊一番新

蘇松賦役甲天下宋行公田稅已多於各府自明以來
數又遞加百弊叢生官民交困世祖朝柯給事請均
田役下督撫議行皆憚於更張吾東李公名復興爲婁
縣令慨然欲除積弊胥役皆不便遷延推諉乃選邑人
公正者馬天騏董其事捐廉設局三月而竣一切徵輸
直捷簡便永可遵守華亭上海青浦皆仿其法四縣民
歡若更生李公作均編要略期垂久遠以他事去職未
幾積勞致病卒於旅邸可哀也婁民梓其所著逐條羅
列載於縣志沈文恪公荃吾淄高念東先生所取士也
爲序其均編要略惋惜再三謂智足燭奸勇足服物仁

足利萬姓洵非溢美文恪工書至今高氏刻其手書楹聯懸于廳事

國中丞撫東時爲言路所糾諸城劉文清公奉旨查辦中丞遣使沿路偵探不知公暗中早已訪實矣中丞於趵突泉呂仙祠扶乩問數修短仙云不知再叩豈有仙人不知者乩云他人可知獨公不可知驚駭問故仙云公獨制千里行一善百萬生靈受福數可以增行一不善百萬生靈受禍數可以減以是不知中丞後果伏法仙可謂見理明論事切矣文清知新城同年伊丹木才具明敏筆墨精能延入幕中辦理此案

東方朔懷肉歸遺細君司馬遷遊覽宇內江山小妻娛
清隨侍皆名流韻事也方朔平原人娛清亦平原人唐
永徽二年河南褚公遂良官同州夜坐西廳見一婦盛
妝高髻再拜致詞自通名諱鄉貫言年十七歸太史公
從之出遊寄此州太史公未返病歿葬長樂亭求作誌
銘恐湮沒也褚公爲之誌書石宋人有搨本杭大宗見
而賦之事極新奇褚公非妄語者人亦不能假託其字
昔人云錢塘蘇小是鄉親彼名妓何足爲重若吾鄉兩
先生之閨媛風流千載輝映矣

周書昌先生言一士人宿泰山夢一古裝女子自稱爲

紀姬云上帝以武王元女大姬主泰山以吾守貞不二
隸元女下爲貴神此說亦甚新異先生樸誠生平不妄
語

膠州法鏡野南埜皆名士南埜于厯城之濼口旅店見
題壁詩云流落江湖十四春徐娘半老尙風塵西樓一
枕鴛鴦夢明月窺窗也笑人其二曰含情不忍訴琵琶
幾度低頭掠髻華多謝西川貴公子肯持紅燭賞殘花
或以爲南埜託詞自寫其落拓然曰西川公子必有所
指似非託言鏡野博通羣經韓理堂序其學古編以爲
得史公深處宋玉叔王文簡未之或先也

候選國子監主簿趙作謀觀察清止先生之子也所爲詩氣體溫厚律調精嚴嘗雪夜與客拈九字詩點筆立成多材技彈琴投壺六博蹴踘之事皆精尤妙於奕飲酒終夜不醉性早慧行坐一室時自言笑莫測所以卒年僅三十餘未疾時有僧素無賴死經日矣復甦言於人曰趙公生我諸君謝遂改悔其事頗怪

秋谷南遊長洲陸其清謬贈以硯其清所藏古硯最多梁代邱遲所銘形圓如璧南唐硯四方平直宋官製貢硯端州下岩奇品又一硯破落而中凹爲文徵明故物餘莫能名所贈秋谷硯必奇物惜不傳

趙秋谷典試山西封公計放榜之期馳至太原聞士論歸美心喜越宿而返不令一人知公名作肱字翼鄰應試青州點名入未幾學使呼至案稱賀曰不必作文汝以子貴受封編修矣是時年二十八舊有園在秋谷之北范泉之南構亭擅一方之勝晚年增臺榭植花卉壺觴絲竹日與弟姪對奕行樂以終其身

青州北郭南陽水水經注謂之澠水齊侯所云有酒如澠者也昔有橋名南陽舊稱曾子固爲文米元章書可稱二絕其碑久亡後復修名曰萬年橋俗矣趙秋谷作記乃考古仍其舊名

翁丹麓棲霞人官侍衛讀書過目輒不忘年十歲貌魁梧如十四五歲者生而多力嘗出遊見童子向一少年索債少年不之應童子婉言繼以泣少年怒詈且捶之翁大不平歸家寢不能寐思必殺少年而後快人定後往叩其戶少年亦兇健聞聲有異挾刀執鎧以出翁卽奪刀殺之歸而酣寢人無知者旣長祖愛其驍果命習武中進士爲侍衛好與文士遊初學仙又學佛久而厭之講道學以程朱爲宗于書無所不窺尤邃于易解識出人意表自言少學拳技于蓬萊劉輝祖僅得其一二輝祖病且死未竟其學然技亦無與爲敵矣師事劉寄

菴寄菴夢之有詩云昨日翁夫子夢中爲我舞氣作經
天虹勢如出林虎妖魅及鬼怪伏首慄雙股夫子萬人
敵大武本不武手中雌雄劒裴公豈足數仰視天月黑
憑陵雜風雨觀此可想其雄傑之姿雙目斜長人謂之
鳳眼嘗與寄菴過小溪望海及返潮至溪漲乃伏身手
扶彼岸足在此岸代橋以渡力未可量也

劉輝祖登州人有客來遇之厚因教以拳勇有武生某
因輝祖納金願受學弗許某怒夜半持刃將往殺之至
則室明如晝客端坐閉目如泥塑舉刀欲下仍不動因
以刀力劈之客以手格其腕刀落于地因以手摺疊某

軀置于牀下呼劉起曰吾不可以居矣爲劉述其狀曰
彼之來雖舉刀無寔意再舉刀則寔意殺我矣劉燭之
赫然死人在焉駭曰某死固當但在弟子家爲累柰何
客曰無慮手拊其背某復活疾歸其家吐血而死異人
謂劉曰汝送吾于蓬萊閣上飲酒閒劉苦叩其姓字曰
姓莊餘不復言起曰吾去矣跳入海中不見

卽墨張扶陽號肖蘇領解時榜名鉛古文能手時藝迥
絕恆蹊超逸者飄飄欲仙渾厚者似歸太僕詩沉鬱原
本少陵而一種清逸之氣自其本色同人推爲曠代逸
才與周肅齋先王父交善往來寒舍每手錄其詩書法

亦工幼時見之不甚愛惜漸失去矣論文以左史莊騷
爲宗以是課徒人多却步廬雅雨先生延之課子見其
步趨太高作七律諷之遂辭去官建寧同知告歸家貧
以山林朋友爲樂古詩云黃鵠一高舉天地呈圓方蜩
鳩指相笑吾惟搶榆枋志識豈不遠所事各有行吾愛
任公子巨竿投東洋期年得大魚離腊千人嘗當其未
得時咸笑不自量毋爲蜩鳩笑當爲黃鵠翔黃鵠邈雲
中蕭然看二蟲靜樹多悲風春暉去短草居世亦何爲
立身苦不早紡機垂髮白書鐙照影小中夜不能寐念
昔心如擣明月照南飛啾啾啼烏烏啼聲動人心淚下

沾懷抱恨無雙飛翼及爾同集蓼

長山苗先生名輪實號東禾家甚貧讀書刻苦年少教
蒙館聞某師精於書義晨起課畢往聽講往返四十里
先生健步如飛回理生徒業及已課程無稍失一日大
雪路絕行人里人開戶見有行蹤則先生已往某師書
館矣至省應試二百里裹糧一日而至鄉薦入都會試
自僻路九百餘里四日卽至中進士自以不嫻吏事就
學博性迂執孤子而衡文甚細先君應縣試時邑令延
之閱卷拔冠一軍遂以師禮事之以文請業晚年自刻
其文不乞人序多短篇簡質瘦硬古音古節觀其文知

其人之峭刻不合時宜也

馮丹林先生君擢幼應縣試有神童之目長而好學在
樂源書院從桑弢甫學讀書刻苦自言讀文時心一出
卽自掐其肉初猶難定後心不游移乾隆甲午中鄉舉
闈文九轉丹成然猶在落卷中爲主司搜出先生循循
善教館泰安宋氏從遊日眾數縣之士將畢集思裁成
里中後進乃歸家教授一時多所造就先君亦以文往
質晚得郟城學博邑孝廉孟柳谷贈行詩云城臨郟子
國人問鄉公鄉蓋吾邑相傳康成曾居此也屢受知於
學使宗匠保舉知縣不就刻有却却齋文集郟城令某

集文選句贈之起句云馮公豈不偉卓犖觀羣書忘其
全篇郊舊有墨泉明季縣令某惡其科第太盛塞之曉
嵐先生過之作詩有云東海遺封舊南朝名士多傳聞
泉似墨古井幾時波先生歸里後過予館舍年八十餘
矣寡鬚眉貌偉岸音吐如鐘談論滾滾不倦

新城何維功字勳臣武孝廉而好文事刻有古文集師
事劉寄菴寄菴自雲南寄以詩兼訊蓬萊翁丹麓詩云
何子平日不好武恂恂書生莫敢侮一朝忽得教外傳
兩臂如鐵力如虎我恨不能親見之我友書來喜欲舞
末云蓬萊進士今健不蟋蟀秋風聽不了如何不封萬

戶侯海外灰心蜉蝣島爲提塘時奉委出差途中陰雲
濃布雷電交作日將暮前無旅店急投曠野中古寺正
殿五楹執石塞戶僅畱小孔在中兩廂無門塵積四五
寸命僕掃除羅列弓刀以備不虞襪被稍息雷霆愈厲
俄屋外通明有四火龍飛至各盤一柱須臾俱由孔入
殿卽聞霹靂轟然窗瓦皆震火之一龍出往西南去良
久引一龍至視前者較小相將入內霹靂暴響有如山
崩遂寂無聲復見五龍出飛躍而去天地陡暗咫尺不
辨主僕心膽皆碎一夜無眠曉至近村告以夜來所遇
擁擠而至皆云素有妖挾戶入視血肉狼籍洒壁上蓋

爲龍爪裂也其中朽骨撐柱不知食幾許人畜矣

初頤園尙書居官風采甚烈叅劾不避權貴一疏叅至
三四十員雖有戚誼同年同鄉不顧也心極公正然宵
小暗進讒言一時不察受屈者亦復有之當時爲之謠
云一心硬似鐵兩耳軟如綿論者不以爲過然接人亦
自和靄絕不故立崖岸人亦諒其無他後奏明入直隸
籍迄今思其立朝敢言之氣如殿上虎亦足起衰振靡
令人畏憚

新城張漢渡象津名孝廉也博學能文碑版之作多出
其手不專爲詩得一妾喜甚作詩極婉麗爲人作聯別

有風趣似不從塵閒來劉寄菴深重之題其撫山樓有
云樓頭高臥日月閒樓上放眼乾坤小中有道德五千
言山人且耕且學仙篇甚長不具錄及門多才士同邑
何氏雅好文墨集同人爲文社會者七八十人延先生
與部曹徐子耘先生文驤主文衡放舟錦秋湖課畢遊
賞談讌一時稱盛欲擇其佳篇刻之名大成集未果偶
見一二磊落雄奇或簡嚴刻削大抵不向墨卷尋討先
生歿古文之學不講而時藝衰靡矣承其學者與同宗
名宗光亦名孝廉弟子問天上星宿指之厯厯問古制
則傾篋倒篋滾滾不窮卽先生可知矣舅氏蘇山嘗從

之遊

汪芝田鏞歷城人以榜眼入詞林典試廣東所取元文人爭傳誦在言路有鐵面御史之稱兩奉使山東讞獄家在省垣過門不入鄉人以錦衣旋里爲榮先生歸林下時荀以後進陪侍意度靄然若不知爲貴官者弟濬爲中書耳聾好談論與人札學十七帖倉卒令人不能句讀好畫好弈閒喜作詩見其長古字句詰曲讀之棘口娶德州盧氏才貌兼擅雨中喜宋勝男見過云霏霖汲汲浸莓苔爲愛荷喧泛酒杯正苦閒庭無女伴詩人恰向雨中來

翟北海濤與先王父爲內兄弟少年文弱旣壯貌甚偉
高談雄辨兼擅拳勇嘉慶戊午鄉舉得武城學博好爲
詩不甚持擇隨筆成篇未免染宋人習氣佳處情眞語
摯亦復頓挫淋漓石子眞爲之評選榛枯旣翦遂表孤
花其從姪竹坡名駿爲余辛巳同年少年丰姿玉映亦
工小楷值選拔之歲學使取冠一軍將貢入太學爲人
訐其歧籍而止其實居淄四五世矣喜爲詩嘗以北海
先生詩委予抉擇不見子眞評選原本予實不辨菽麥
謝之竹坡爲人孝友父歿爲諸弟延師課讀竝從兄弟
之好遊蕩者亦約束其中時家已中落獨力支拄門戶

得蒲臺教諭卒無子歸里將搜其詩卷使勿湮沒

曹太元佳和英才卓犖作文鎔鑄史傳議論警闢會試
魁文人爭傳誦以部曹告降爲貴州縣令解鉛入京行
至巫峽兩崖夾峙壁立千尋上露青天一線江流湍急
疾如飛箭船磨石將破岸有微平處急登之船已沉倉
卒從人莫救日暮猿啼終夜魂悸猿或蹴碎石下墜幾
死者數矣太翁刻有詩集以孝廉爲吳橋令先生隨侍
佐理故於吏事精明幹練歸里後多從遊者先生與先
君同學荀以文藝請益示以書言先王父與其尊人交
好每過從已執壺觴以侍翦燭談讌嘗聽餘論旣與先

君共硯席又相得及荀交三世矣許以文無山林氣將來必達又教以文必熟作日成一篇相待如家人深佩其言先生健於文未鄉舉時晨出行田閒早炊時歸文已完日日如是及晚年課徒每早作文飯畢誦讀不廢正業仍自作一篇文成於心借書於手雷霆精銳冰雪聰明又復行閒茂密無一懈筆其實成之頃刻閒耳五日一課文二篇詩賦及古體詩或律或七絕隨所欲課程嚴密一時裁成甚多及卒學者失所仰矣先生身短聲宏口如懸河刻有文稿

王秋水祖昌新城人住石橋與王石丈爲從孫亦漁洋

之族人也貌樸魯好爲詩阮芸臺先生視學山東崇尚
風雅秋水入古場作論詩絕句數十首大蒙激賞拔冠
諸生自是益肆力爲詩求周林汲先生爲點定好遊晚
年東西南北奔走不倦謁鐵冶亭阮芸臺兩制府劉岸
淮劉松嵐兩觀察海豐張公映璣轉運杭州至其署畱
住西湖月餘盡登臨遊覽之興聞洪稚存自塞外歸訪
之里門稚存稱其詩興會飈舉題其詩卷有云唐衢每
爲生靈哭王濟猶嫌臣叔癡北望關河水霰少塞鴻歸
計尙須遲對客好自誦其詩聲殷牆壁嘗語人云詩不
須多一二語足以不朽如我詩中一峯纔去一峯來又

賣花聲裏過揚州足千古矣其任誕如是然七古豪氣
奔放七律音調高朗自由作詩功熟滇南劉寄菴先生
大紳宰新城接引後進才士爭趨其門秋水與焉寄菴
爲山東循吏署曹縣蒞新城皆有惠政被吏議戍軍臺
兩縣之民洶洶震動秋水乃挺身于兩邑募得數千金
走京師叩貴人之門力爲營救寄菴方出關追回一時
義聲動遠邇如四溟山人出盧次梗於獄也子名竹女
名蘭有送父出門詩附集中

盧南石先生少時依婦家長山袁氏尙未娶也從師讀
意氣豪邁不屑伏案及晨書累尺許每翻一頁目十行

下至函丈背誦如流應秋試發榜日無耗夜入空輿中
涕泣旣而報至則自本籍德州回矣會試後方歸娶自
卜行藏掣籤於正陽門關帝廟籤云五十功名志已灰
誰知富貴逼人來結云壽至耄耄位列臺後果驗

高億堂中謀念東先生六世孫年少能文一出冠儕偶
與從兄杏江宴謀俱以詩受知於阮芸臺學使億堂爲
諸生時前輩皆讓出一頭地嘉慶戊午鄉舉春闈幾得
復失者屢矣年五十乃登第會元卽濱州尙書杜書農
素受業于門者也先生才具明敏諸事無不諳練同人
稱其精神滿腹里居時余以文請業得其指授爲貴州

縣令聲譽翕然上憲器重調貴筑陞同知不日擢用矣
引 見後過里詢知先君卽世深爲唏噓咏杜詩云訪
舊半爲鬼孰知其一病不起也縣試所取第一有議之
者作白燕詩以喻意自謂清白傳家一塵不染余有詩
遙和未存稿高氏世多詩人先生輯爲高氏詩彙乞內
兄杜石樵先生爲評選未及刻女一適諸城王金策之
弟病中合卷實未同牀至今守節一子諸生早卒有二
孫杏江藹然可親兄弟掉鞅文場卓卓有聲可稱二妙
嘉慶辛酉拔貢冬日集諸同人賦詩爲樂先億堂卒子
遠旬余兄顯亭壻也邑諸生刻苦勤學將繼父志少年

玉折爲之慨然

孔荃溪昭虔曲阜聖裔嘉慶戊午鄉舉年纔二十餘有
蘆花詩四首僅記四句云月滿孤舟人釣雪沙明兩岸
雁啼秋好隨流水漂紅葉莫向西風怨白頭先君語人
曰詩佳矣第少年有牢落之感恐終身坎坷旣而已未
聯捷入詞林青雲直上乃以寫書謬誤在事者皆罷職
先生亦歸里矣久之復起用後官副使不久卽卒未竟
其用嘗以一聯贈先君書法秀朗似三春楊柳

鹿雪樵與劉寄菴善來遊吾淄交孟柳谷柳谷詩和平
樂易以自然爲宗一切雄奇險怪語謂不自肺腑流出

不取也雪樵金鑄賈島多幽思苦語余嘗與柳谷先生
翦燭觀雪樵詩集柳谷指其句云如鐙昏古佛愁何嘗
不佳柰氣象幽慘余問古人造句之生者柳谷深推浪
仙謂非孟郊所及又未嘗是丹非白執一偏之論也雪
樵家甚貧忘其名諱居址子官浙江兵憲以海疆失事
掛吏議

孟柳谷初名純乾號翁谷後改詹繹號柳谷性洒脫不
拘世法母病學醫醫精母歿擇葬地因精地理朋友及
從學諸子詩文佳作對客朗誦如宿讀者談笑風生四
座傾靡無迂腐語無世俗語與之接覺天地閒無非樂

機集同人爲文社名其地曰凌雲臺及門多掇科以去
精於時文閱前輩文評選獨具見解自謂慧眼不虛也
每試輒冠其曹而行文如不着意自然高雅不屑閉戶
伏案好遊觀山水喜作詩善書與朋友唱和往還偶取
時下闢墨揣摩三月嘉慶甲子遂魁其經不衫不履見
者知爲名士風流與人無町畦無不相與以誠少與先
君同學於荀爲父執而每樂與荀談文夜至三鼓不倦
從寄菴學詩書法亦仿之寄菴告終養南歸與諸人送
至黃河諸人皆有贈別詩惟先生擅長起四句云忠孝
一生事誰云輕掛冠臣來萬里易親到百齡難二十字

中無限曲折字烹句鍊可以鎖紙寄菴黃河南岸賦別
諸故人云看君南望復傷神予亦啼痕無舊新最苦黃
河春水淺烟波不隔送行人

牟陌人廷相博學好古一時無兩自爲諸生學使按臨
必第一來山左典試者亦欲得其人以爲重而澤筆于
古花樣不合時暗中摸索卒不能得陌人亦無意仕進
或僅入頭場卽止曰誰復知吾文者終場何益子房超
時好中魁選陌人晚年究心古經著作滿家劉寄菴贈
詩云著書滿屋梁泰岱失嵯峨心精多獨得妙義相印
可往往笑古人遺大舉叢豈我困風塵中欲行足已跛

開卷字不識低頭自慙懣

劉夢周希莊少年與先君同學爲文清真簡潔試輒冠軍以貢入都極爲宋小坡先生所賞終見擯於有司平生不爲腦滿腸肥之文雖不得志終不易轍接物和雅而諸事精明縣中有大事或有疑難質之先生指畫明晰爲正人所倚及歿無不追思荀與先生館舍相鄰四五年以父執常請益得蒙指授深荷青目受業者屢滿戶外次子申祚字式南年少能文先生以遠到期余兩人乃余終因禮闈式南道光甲午舉於鄉先生已不及見晚得教職將赴選而病作囑子以墓志相委式南亦

至今未第遭遇坎壈計年近五十矣小坡先生名璜蘭山人爲部曹以文名好裁成後進居京師以文會者常七八十人先生爲設饌豐盛都中少此舉也後官知府聞其家書香猶盛式南多藝能舞刀奪槊拳勇過人又能以豆腐作七十餘種

外王父號臨溪諱兆塿世居新城於漁洋爲族孫善園某工詩遊江西三年題詩滿壁家有別業臨錦秋湖去家四十里作書縛犬項犬卽往得書以還往來不爽古人黃耳傳書不虛也在江西時聞有一百四十歲老人偕諸友往訪至其村遇一叟問老人欲見之叟曰渠亦

人耳見之何爲固求相引至一舍復問老人叟曰吾卽是也視其貌若五六十歲者問子孫幾何云一子年八十餘洩溺不知甚可厭惟曾元輩耳外王父歿時荀方四歲生平爲文規撫大家族中多掇科者視之蔑如然終不售詩文少有存者

四川李雨村云楊爽山東濟南名士也有春愁云世無知爾方爲貴地有容吾不算貧書帶新生窗外草瓶花自護雨中春長將曉露論前事祇作風鐙看此身好客孟公思往昔愛山靈運竟何人讀之想見胸無一事筆有千卷今高士傳中人也

前協辦大學士兩江總督孫公玉廷濟寧人任江督時
禁米船入洋有言海島窮民需米公知奸人所爲賊將
藉以接濟力斥其非有奏州縣陋規宜指明奏上者公
言旣曰陋規何可奏上且恐將來藉口公然徵索派累
滋多 上深嘉予立得停 聖主虛衷之美大臣事君
之義兩得之矣邑人有買遷在江蘇者云公出巡各屬
用船較往時減過半廉靜之風可想子善寶江蘇巡撫
瑞珍兵部侍郎孫毓淮道光甲辰狀元任修撰公勲業
在國史無容敘述偶有所聞略爲記之爾

王鹿村孝廉長山人名衍霖才氣敏捷無不狎弄而出

口風趣令人絕倒縣令湖北夏某才士也元宵張燈作
春謎徧題燈上測中者贈菓品玩具綠村年方少入署
俱收之守者曰尙未觀謎何遽取物乃隨着隨測錄畢
無一誤者令驚喜稱爲異才家貧而意氣疏豁出外就
館僅具一灰鼠裘有友借用遺於路惶愧相告一笑置
之遺貴人詩云誤向門前通一顧旁人錯道卓文君其
有定守如此晚年造生壙置床其中病卽坦臥囑家人
不以棺斂嘗館吾邑高子固表兄處子固族有名勳謀
者往見云久聞先生聰明綠村曰聰者無不聞子之來
吾未聞也明者無不見子之入吾未見也隨口嘲諷機

變百出人多愛其才而畏其口其實胸無町畦所最惡者膏粱與市僧耳勲謀邑諸生忘其號少與先君同學才氣卓犖喜爲詩都中故人招之辭以詩有云諸君北闕求名日是我南山種豆初目短視鬚髮交白而面色腴潤談論風生聽者忘疲著有詩集未刻

都憲毛伯雨式郇厯城人祖太常公名輝祖居官有聲公尤抗直目短視口微吃而持正如山不可動搖在吏部時有當補散州營謀直隸州者同列無言公獨不可堂上官三人欲爲之通融堅執不聽初頤園尙書絕不徇人情者亦爲緩頰公怫然曰君閉門思過之人何強

預外事初公慚而退公爲初氏壻而頤園又前輩尊行其餘毫無遷就可知剛正之名大震亦因是不合於時官亦遲滯不計也公爲庶常習清字散館爲主事官宗人府丞最久屢司文衡

王孝廉應桂字丹林從父流寓章邱祖母以貞女撫孤丹林事之盡孝李戟門廷榮作五古咏之丹林幼有雋才焦笠泉太翁教之成立太翁臨歿以少子托之丹林盡心教讀笠泉遂登第入詞林官給事視學山西而丹林以荏平學博先卒矣笠泉多所條陳嘗以舊作爲余書扇蓋己丑秋與查又山侍御集陶然亭所賦蘆花詩

也蕭蕭槭槭帶斜矐頭白何人不似君旅雁翅粘前渡
雨眠鷗夢破隔溪雲烟橫極浦迷千點霜入滄江老十
分開落漫須愁太寂且隨流水去繽紛風霜閱歷自年
年獨立蒼茫感逝川雙板舊扉畱粉本一橋涼雪誤吟
鞭折來欲試仙才筆擁處嘗供釣客眠惆悵潯陽江上
句慣知楓葉送行船鄉心昨夜夢明湖半幅清秋冷畫
圖野岸西風捲不盡空堤白月影全無一汀露下漁邨
晚十里帘飄酒肆孤轉眼春江生意活青青芽短色平
鋪餘一首未錄笠泉名友麟

李孝廉廷芳厯下名士也工試帖師我法集在都時有

友人借觀適紀曉嵐先生來翻案頭得詩本開卷見花
裏尋詩到杏壇一作甚爲擊節卽濡筆和之題於卷前
翟鱗江贈以詩有云尙書紅杏真知我居士青蓮又屬
君人服其雅切

歷城翟鱗江凝清明與友遊閔子墓題祠壁七絕一首
末二句云笑指南村風景好杏花紅出破牆來鱗江嘉
慶甲子孝廉長身玉立工書善詩談吐風流以知縣候
補未久遽卒

濟寧史梅叔或云梅裳以拔貢得縣令少好爲詩初自
阮公咏懷入繼喜新奇力矯平庸之習字句未盡妥貼

後乃趨步少陵天資既高功力亦遠雖未脫盡面目是
吾東一作手也送別云我意如春柳千條復萬條併君
過雷澤帶雨出藍橋若見天南水應知東海潮便應掛
歸席千里不爲遙咏草云啼鳥一聲晚碧雲千里沉青
過成樓去亂向遠山侵遲暮傷春意更番損客心年華
歎芳草冉冉不能禁落葉云秋雨滿江城秋風木葉聲
并將搖落意入此夜深情況我滄江遠何堪魂夢驚一
燈照四壁窗白不成明咏西事云豈足勞戈馬腥羶合
掃除勢殊追鄩善命可制康居但慎花門破行思絕域
初相安廉恥將清靜復何如前三首似屈翁山後一首

未免學杜似杜亦未知其指何時事也

新城諸生耿希尹維莘好詩與吾淄孟柳谷交最密聞其病則憂愈則喜死則哭皆有詩自肺腑流出柳谷晚得子以幼女字之古人交誼於今復見師事劉寄菴寄菴還滇南有訛傳其歸道山者方與客飲擲杯而起題寄菴入關圖云路入燕山風怒吼隨風捲地沙石走黃昏漠漠無人烟寒雲慘淡張家口誰能到此膽不寒君侯吐氣貫牛斗四野父老哭向天烈士飲恨嚙其拇何幸絕塞得生還豈非我 皇恩德厚匹馬長驅入漢關黃童白叟齊拍手去年雨雪迷前途來時路旁折楊柳

楊柳依依相映發滿眼春色迎馬首年七十餘刻抱雲
閒情二集將稿焚灰置匣於山之峭削處命石工鑿龕
貯之題曰詩冢婦李氏名溪娥益都李南澗文藻之女
也亦工詩采石磯云蛾眉亭畔萬松攢太白樓頭縱目
看十里青山雲霧捲梅花片片落江寒永濟寺云燕子
雙雙掠烟村寥寥一犬吠雲根舟人遙指西山裏行盡
桃花是寺門

歷城周二南名樂林汲先生之族姪也喜爲詩困頓場
屋晚年成歲貢咏風箏云猶畱一線青雲路未免羣兒
曰眼看牢騷之意可見刻有詩集子來蜀過馬嵬坡楊

貴妃墓前亭中石刻嵌壁視之二南詩也匆匆未錄至
潼關廳見李商雲名肇慶亦厯城人嘉慶甲子舉人二
南在署邀與共談數語別去聞二君皆作古人矣何勝
太息

石子真丹文夙負異才長山人少遊蕩入都窮無所歸
就日者卜占畢謂之曰我囊無一錢贈子以詩可也走
筆成章其人亦高士隱於卜者誦詩大稱賞薄贈路費
使歸遊寄菴先生之門寄菴奇之曰此吾友也不當在
弟子之列子真少年氣盛視掇科如拾芥方事舉業行
文如山奔海立趨時之作亦花團錦簇而豪情颺舉屢

見賞於宗工終不獲售晚得足疾意甚牢騷作紅葉媒
小說以寓感慨於詩精於持擇評選唐宋及近人詩實
具隻眼當世學韓蘇之豪放王孟之清高自詡得骨得
髓而實則掠取皮毛子真一筆抹殺如石崇持鐵如意
擊碎王愷珊瑚樹也其所賞鑒無不心服近時如袁簡
齋蔣心餘雖所心折而詩登甲選者僅十分之一二持
論不拘唐宋而能聽曲識真軀肥短貌不揚目空儕輩
自存詩亦甚少刻有春雨園詩余遊蜀傳其已作古人
矣

研村老人余祖兄弟行也諱作孚居同里閑工書嗜古

帖應科歲試每號五六十人板短人擠不能橫肱一手
持卷一手謄清字不欹斜同人咤爲絕技性和雅善談
諧遇童子年十五六好爲詩吟其得意句夜月抱琴眠
老人笑謂之曰子無妻耶折花在途遇一伎強索老人
曰吾口占一詩汝能背誦卽贈汝其風趣如此闢小園
築石癖齋余幼時同兄顯亭讀書其中齋後翠竹森森
巨缸蓄紅白魚窗前亦栽簌簌萬個余讀唐詩師爲講
解諱思蘊族伯父窗竹夜鳴秋句余自忖曰卽此是也庭中刺
松黃楊檉柳文官果木參差蔽虧橘柚柑櫟及雜花羅
列階墀夏日靜堂虛殿老人偶至白髮飄然婆娑其閒

或伸素紙丈餘解衣磅礴濡筆揮洒余幼不識但見龍蛇蜿蜒滿紙而已予思睦號敬和亦好作字閒爲小詩嗜酒善談尤癖於石余溜在萬山中每雨霽路滑輒入澗谷剡苔剔蘚搜抉泥沙以求石取其紋多而深者形狀詭異者骨瘦無肉者黛色濃皴者列上品積日旣久所蓄遂多雖未必及米顛袖中之物而羅列滿案皆具峯巒形勢奇秀如華尊嚴若岱衡山九面羅浮兩峯亦儘可縮之如拳不必蠟謝公之屐覺天下名山近在几席矣昔人袖中東海壺中九華信不予欺歿後園已易主樹木摧爲薪石亦落落星散竭數十年搜求之力大

都供村婦支竈野童敲火可慨也夫

新城王書漁洋從幔亭土驪之曾孫長身偉貌音吐如

鐘滇中劉寄菴爲邑令擬之麟鳳所作時藝戛戛獨造
勁氣硬語似不從人間來讀者往往咋舌不解作何語
其實直挾神髓細筋入骨惟掃盡浮靡難投時好耳家
甚貧奔走風塵亦工詩或寫山水自適放筆隨意亦不
屑屑前人矩矱有客遊金陵見肆中懸其畫問價索千
金客笑曰此吾邑王孝廉所爲乞之甚易市人駭顧昔
王石丈亦漁洋族子甚稱之張厯友贈以詩云先生琅
琊之文孫清標遠出清德門余見其長幅青綠山水氣

清筆蒼固爲可喜如書之疎放尤爲卓犖劉寄菴題其
畫卷云畫史從來易局促設色工妍未免俗先生縱橫
皆自由故是胸次忘榮辱市兒却笑先生窮眼中只有
田舍翁試想解衣磅礴處當年意氣何豪雄一自騎鯨
上帝側粉本神山世莫測芙蓉白玉高樓中大笑掀髯
亂潑墨其意態可想見有子甚慧能文早卒刻有文稿
一子病拘攣老妻雙目俱瞽先生有句云兒身再健癡
無碍婦眼重明老亦佳字餘人作字餘人序奇趣橫生
古文好手也

朱西岑其桐德州狂士歲試劣等乃大書五等生員宋

其桐七字于坐前科試卽冠一軍連中癸卯孝廉有太湖詩云溪畔新秧映白沙嶺頭古木絡藤花雞聲隊隊來何處路轉峰迴一兩家

西岑蒙泉先生子能以詩世其家

齊河郝鏡亭名允哲中進士未出仕卒穎悟好學以詩名齊魯著有深柳堂詩集弟允秀字寅亭十四歲能詩十九刻有拾翠囊詩與兄鏡亭棣萼聯吟人稱二難任陽穀學博年逾古稀晨昏一編不去手所選濟南名士詩鈔不下數萬首惜未刊行平生自爲詩亦不下萬首而自訂其詩刪存甚少名秋水詩集鏡亭之子荅號餐霞女秋岩皆有集一門風雅吾濟後來稱詩者歸焉兄

弟所與往來如周林汲董曲江兩先生吾淄張敦夫廷
敘新城王秋水祖昌皆一時知名士宜其詩之可觀也
咏濟南古今詩人皆可誦

前博山令武虛谷億河南偃師人天資絕人讀書過目
成誦聞文奇古幾于自成一子淺學者倉卒不能句讀
主司特賞之中魁選虛谷兼精技勇膂力莫當嘗躬擒
巨盜乃權貴私人以是罷職後復官至州牧文人傑士
不盡其才可惜也

余鄉試房師卽吾淄邑令

夫子諱慶長同宗寄籍直隸

少年隨任山

東結婚聊城太夫子歿家貧教授生徒以文名素著歲

得修金盈千及選縣令缺甚瘠乏貲引見時與選淄川者對換西客自願以金相借人情炎涼如此性厚重和雅不邀虛譽所謂當時無赫赫之名而去後令人思者前任東撫琦侯政尙嚴明荀進謁問邑令居官荀素不能飾辭以仁慈對侯曰仁慈固好但恐不善馭胥隸夫子外渾厚而精明內蘊每奉檄入省審巨案侯之問蓋有意而荀不知未幾調繁聊城卽夫子舊遊地亦異事也人情風俗皆所素悉某山某水某塘某里僂指可數荀以部民未嘗通謁及列門牆歲時起居得到後堂相待如家人至是一別不復見矣後升水利同知東昌同

知六員皆閒曹宦橐蕭然歿後一子貧如洗甚矣廉吏之可爲而不可爲也迄今吾邑數循良猶屈指及之白髮門生感念爲何如乎夫子苦州縣繁劇每頓足曰不如吾教書但公明倫前任道憲新例請捐復亦夫子及門

李毓昌卽墨人性剛直少年登第分發江南委辦山陽賑務山陽令王伸漢吞食與毓昌商同隱匿毓昌不可卽具稟欲上制府令恐使人與李家人置毒更懸之作自縊報上憲毓昌叔太清搬柩還妻檢皮衣見袖有血痕疑有別故太清赴京控訴山東撫院奉 旨檢驗柩

宿旅店仲漢潛使人來東焚之欲滅迹以救得免自是
野宿及驗棺不可開斧之堅如石蓋以碎磁捶極細合
膠以麻蘸入披棺徧滿復裹以紬漆之堅不可動恐回
家啓棺也乃以火盆四面烘焙膠鬆軟啓之釘甚長直
貫至底屍未壞蒸檢無迹有潛以藥水入者復檢防察
極嚴驗骨黑惟近心返白蓋毒未及攻心也審實山陽
令伏法知府王穀號王老虎以附同抵罪毓昌加知府
銜嗣子希佐 欽賜舉人太清武生 欽賜武舉家人
包詳凌遲摘心以祭顧詳李詳馬連陞皆斬決示眾
仁宗皇帝御製憫忠詩三十韻成親王代書刻碑立墓

炳耀海內無不伏讀欣誦以縣令膺此曠典眞希有也
首云君以民爲體宅中撫萬方分勞資守牧佐治倚賢
夏年久不能全記中有云袖血最難防又骨黑心終赤
誠求暗盡詳又毒矣王仲漢哀哉李毓昌隨波同制狗
持正犯貪狠施賑忍吞賑義忘禍亦忘等句結云何時
降申甫輔弼協名揚表忠嫉惡求賢若渴之衷千載如
見按王仲漢曾爲吾淄典史幼時見之循循文雅人似
精明一念之誤身名抉裂可不畏哉

吾淄楊旭橋春楷明府嘉興人夫人吳氏善畫竹兼工
詩予來川辭行贈以四軸揭於石者自題五古一首大

竹王魯之題五絕帶來川李廉侯借去現任邑侯江西
清江呂公芳楷號翰仙夫人劉氏號竹筠名鳳齡工詩
嘗題鄒大令鴻放彙書歸養小照云馱鈴隊隊聽分明
十部青箱萬里程定博倚門人一笑歸來猶是舊書生
努力加鞭莫暫停馬蹄亂踏蜀山青趨庭較勝趨王事
一路經香不斷馨有西蜀女士佩珍者爲王湛餘司馬
側室讀竹筠夫人詩愛之繼作云纔聞前路著先鞭又
指鄉關策馬旋迎養未能歸養切彙書萬卷不名錢珠
光玉屑映征鞍漫說書生氣味酸官樣到家休遽棄宮
袍著與老人看鴻放喜佩珍爲同鄉閨秀柬以二絕云

紅閨豔說是鄉親不比錢塘舊結鄰占得西川靈秀氣
峨眉纔毓掃眉人忝侍才人號小妻倡隨贏得與夫齊
白頭吟是吾鄉作爲語王郎莫遣題鄒大令名光越王
司馬名觀澄皆官山東

王立性號太初侍郎王颺昌之孫好讀書十八歲入泮
繼母待之刻走遼東教讀奮志自勵臥牀以首抵壁吟
誦不輟壁爲之穴十年乃歸聯捷成進士補婁縣至境
書役父老跪迎滿岸太初張目四顧不知所云良久隨
從家人喝曰起明早來接太初長吁舒氣曰如此何不
早言人以爲笑見呈詞有餘紙輒喜隨筆作文幕賓力

阻乃止有母首子忤逆者詢之繼母也大怒曰天下繼母無善者掌責爲所控上官與其祖有舊謂之曰子工于文不善居官可告歸有文稿未刻人爭傳誦闡中錄之或得售太初高密人

汴梁有爲高密縣尹者後入籍所居曰梁尹莊後人有官鹽院者家富書籍子亦孝廉孫號書箱凡詞賦辭典人所不知問之曰在某書第幾卷幾頁檢尋無訛因得此號从相沿習竟沒其名此公胸羅二酉而未融化入場操筆累累二千言博徵墳典終身未採一芹生四子二孝廉一歲貢一諸生皆現存書香猶盛

王北野名驥乾隆己酉拔貢爲文沛然莫禦有聲場屋
卒不得售貌魁梧健談豪於飲興發高歌旁若無人時
作詩不多存其孫諸生名朴委子決擇惜不記憶書室
後有園竹樹蔚然園築小樓後臨曠野予幼時常常遊
眺雖在城內而有山林之趣先大父與先生交好結兒
女姻先君亦嘗讀書其家因苦讀嘔血乃歸昔有人祈
神仙云不願富貴但願讀書家有田園衣食粗足終身
優游而已仙大笑曰富貴非上帝所惜若汝所云乃人
間清福不輕予人此雖寓言實有至理先生席先世餘
業不乏杖頭錢與酒客詩友日相談讌享清福者三十

餘年晚得泗水學博未及赴而卒其友如馮丹林高子固劉夢周皆一時豪俊閉戶不與外事今屈指無似先生之豁達豪爽者記之爲吾邑典型之一

漕督周公敬修名天爵汶上人嘉慶丁卯舉人其後成進士爲安徽令邑多盜賊橫行無忌公力絕人能雙挽十二力弓尤精擊刺手擒巨盜剗目斷手剔其腳筋御史某劾以殘酷時鄧公廷楨爲巡撫覆奏某愛民如子嫉惡如仇凡所究治皆窮兇極惡自是治聲益著歷陞至封疆大臣初公與涪州陳馭珊葆森相知最深馭珊能吏公爲邑令陞去陳代其任及公總漕運馭珊陞壽

州牧嚴於治賊懸三千金購要犯捕役貪賞賄小竊冒認獄具以事關糧艘送公覆訊公云陳馭珊審定安有誤者犯至翻供不聽刑訊死既而獲正犯馭珊獲罪公亦革職留任後被議去官發往廣東効力大將軍奏薦云某監造兵械躬親驗試任勞任怨實爲可靠 賞三品頂帶總督漕運以疾告歸兩湖人猶思之

李公毓昌一案巡撫吉念提屍棺於臨清檢驗審實後諸長隨均凌遲處死猶恨其情浮於罪荼內加鳩手灌其主李祥解至墳前先夾一次凌遲後摘心以祭顧祥馬連陞先責四十板包祥創謀亦先刑夾一次王仲漢

斬決梟示無不稱快或將 仁皇帝御製憫忠詩刻板
遍貼衢巷或編爲唱詞沿街演說鎮洋諸生黃景濂作
李進士詩云事泄禍及身幾露肘爲掣成敗且勿論臣
心庶昭雪淮陰多餓夫賑粟 國恩微但見官吏肥不
聞羸老悅利藪視固然君乃夷不屑上聞良獨難勿欺
聊自揭見忌繪狗徒酖謀起茗歆沈冤貫虹霓天理亦
疑絕一朝爲發覆梟獍快車裂煌煌憫忠詩豐阡壯碑
碣綿綿忠文褒奕世延瓜瓞卑官未爲真立志已高潔
奈何肉食謀爭先慕明哲我想山陽民哭聲聽幽咽